



TAPAK 10

US Tatong Tir Seoul nung lir;
N. Korea atema jembitsü

TAPAK

Praneeth-i tan mezu¹²agsüa
Super Series title benogo



VOL. XIV NO. 177 (ADOK 177)

DIMAPUR

MONDAY

APRIL 17, 2017

5.00

Nagaland nung Yisu Khrista shia aruba benjung amung

Kohima, April 16 (TYO): Nagaland nung Khristantemi Yisu Khrista kangki nung metaba sülen shia aruba atema benjung tulu ayongzüka mungogo.

State tesem balala nung arogotemi Easter sentongtem ayongzüka agi aser iba mapang sayutsüingirtemi Yisu-i meimchirtem alangzüksü atema tasü nungi shia aruba nung ajemdaker tamangertem taküm melenshitsu tayongzüka agtija liasü.

Nagaland yimtiba nung tanep tamangertemi World War-II cemetery nung adenshia special Sunrise Service nung aden.

Iba sentong ya Kohima Baptist Pastors' Fellowship (KBPF)-i "Pa Shia Aruogo" omen nung ajemdaker ayongzüük.

Sentong nung taoba Nagaland Baptist Church Council general secretary, Rev Zhabu Terhuja-i o jembidang, "Yisu kangki nung metaba ajanga Pai lokti nung tesentaktep tasen ka yanglu aser iba den Pai asenok meimba ama asenoka kati ka meimteptsü tetuyuba agütsü" ta ashi.

"Khristantemi Tsüngrem temeiem ya lokti nung tesentaktep ajak nung lemsateptsüla atema süöki ia blemtsüla" ta Rev Zhabu-isa ayongzüük.

Paisa ashiba agi, "pei linük nung teraksa bener arutsüsa alima



April 16, 2017 nü WW-II Cemetery, Kohima nung tamangertem Easter Sunrise Service nung adenba aser tongti o jembi Rev Zhabu Terhuja den tangartem noksa nung angur.

nung nisungtemi parnok temeten atema lungkak aiter aser rarar. Yisu-i pa indang temeten aser maongka ajak toktsür, ajemalua aküm aser meimchirtem temenen atema kanga bilemja Pa taküm bendanga agütsü."

Yisu-i tashi angatsü angatet aser pa taginübatem toktsür meimchirtem atema ang talila bilemstü. Tanü Tsüngremi Pa sülen anidaktsü atema ajar, tema tereprangtsü nung masü saka tanela nung angateta bendanga agütsüsi

ayongzüker, ta Rev Zhabu-isa tesentepertem ayongzüük.

Ibaji inyaktsü atema lenmang ana lir. Galatia 5 & 6 nung, pei taginübatem kangkidong nung metatsü aser tajangzüük lia tanela metsü proktsü indang shia lir, ta paisa shisem.

"Easter Sunday ya mali ka asübo, Yisu kangki nung metaba anogoji alima putisotsü nung Hokolbar tamajungtiba süla, saka Yisu Khrista shia aruba tashi ajanga iba tetsübutsi anogo jagi

Good Friday ta melentsü. Iba anogo ya 'Hokolbar Tajungtiba' ta ajatsü tetemsü, kechiyong iba Hokolbar anogo nung asen temenen ajak alangzüük aser iba anogo nung Tsüngremi asenok dang teti tatem makaba taküm atema lenmang sayu," ta Rev Zhabu-isa metetdaktsü.

Iba sentong nung KBPF Advisor, Rev Asangba Longkumer-i salem osang aben aser KBPF President, Rev Vevo Phesao-i anir Nagaland atema

balaka sarasademba mapang agi.

Tanep sentong nung mendenji KBPF Associate Secretary, Pastor Nitoshe Zhimomi liasü, Pochury Baptist Church Associate Pastor, Mosa Tsang-i lai zünga sarasadem, Salvation Army Church nungi Lalrinpuüi, ALBERT Church officer's Hill aser NCRC Kohima Village temi ken ajanga shilem agi aser Tangkhul Baptist Church Pastor, Rev AS Vaoshok-i tenüngsang agüja tembang.

VHP-i nashi tepsetba, nashishi achiba nokdangtsü

Panaji, April 16 (Agencies): Deobarnü Vishwa Hindu Parishad (VHP)-i taruba küm ana tsüngda Goa nung sorkar teyari magii nashi tepsetba aser nashishi achiba khenyongi nokdangtsü ta metetdaktsüogo.

VHP-i Bajrang Dal aser Durga Vahini activist tem teyari agia state nung iba tenokdanga agütsüsi, ta VHPlenmir Radha Krishna Manori-i osangbener dang ashi.

"Linük nung tangalen ama, Goa nunga onoki nübortem nashi tepsetba aser nashishi achiba anema tesayuba agütsür. Nenoki küm ka mesüra ana ata liang, onoki Bajrang Dal aser Durga Vahini züngsemtem teyari agia nashi tepsetba nokdangtsü" ta Vasco jila nung Manori-i osangbener dang ashi.

Ayodhya nung Ram Temple yanglutsü

atema sentong ka nung adentsü atema Manori ya Vasco-i aruba liasü.

"VHP-i nashi tepsetba mesüra nashishi achiba nokdangtsü atema sorkar shinga indang teyari magitsü, kechiyong onok kübok - Bajrang Dal aser Durga Vahini nati ibaji inyaktsü tashi lir" ta paisa shisem.

Hindu nung nashiji "tetsü" ka ama külemer aser VHP-i 'dharma raksha' yimya benshi aser iba nung 'gau raksha' densema lir. Bajrang Dal aser Durga Vahini ajanga VHP-i nashi tepsetba nokdangter. Onoki sorkar nungi teyari kecha memeshir, ta Manori-isa ashi.

"Hindu loktilibai aginüba ama onoki inyaktsü. Goa nung onoki nashi tepsettsü mesüra nashishi achitsü memelatsü" ta paisa shisem.

India anüdoklentip tsütsü kanga atsüksü, tzünglu arutsü

New Delhi, April 16 (Agencies): India Meteorological Department (IMD)-i taruba anogo 3 nungi 4 tsüngda Maharashtra, Gujarat, Rajasthan, Punjab aser Haryana nung kanga tatsük asütsü ta tekümdangtsü osang metetdaktsüogo.

IMD-isa Bihar, West Bengal, Assam aser Meghalaya nung tsüngmok atena tzünglu tulu arutsü osang metetdaktsü.

Pakistan aser Rajasthan anolen tsütsü anti-cyclone ajanga India anüdoklentip tsütsü tatsük akümtsü ta department-isa ashi.

Taruba anogo asem-pezü tsüngda

Rajasthan, West Madhya Pradesh, Saurashtra, Kutch, Vidarbha aser East Madhya Pradesh nung kanga atsüksü aser iba mapang Jammu & Kashmir, Himachal Pradesh aser Uttarakhand nunga tatsük asütsü, ta IMD sangdong nung shia lir.

April 16 nung 18 tashi Assam, Meghalaya, Nagaland, Manipur, Mizoram aser Tripura nung tsüngmok atena tzünglu tulu arutsü, ta parnokisa metetdaktsü.

Maneni taruba ghonda 24 tsüngda Andaman islands nung cyclone Maarutha ajanga tzünglu kanga arutsü, ta IMD-isa shisem.

Manipur nung JAC-i district tasen ka tentettsü akhanger

Imphal, April 16 (Agencies): Manipur nung Joint Action Committee Against Anti-Tribal Bills (JAC-AATB)-i district tasen ka tentettsü atema takhangba agütsür aser ibaji Churachandpur district nungi agiteta 'Lamka district' tentettsü atema lir.

Honibarnü sangdong ka nung JAC-AATB-i ashiba agi, Lamka district tentettsü akhangbaji ketdangsubaren nung tintem malitsü atema lir.

"Lisopurtemi tasürtem atema mang ayimba mapang ka nung aser külen JAC-AATB-i pei sasa liyonga aotsü atema raraba mapang, taoba Congress sorkari shinga dena asüngdangya mesüi kounung nung district tasen 7 tentet. Iba ya lisopur tsüngda telemsa adokdaktsüsi atema liasü" ta sangdong nungsa metetdaktsü.

"JAC pusemba kin/telok kar mesüzüksü atema parnokki iba mapa ya inyak. Manipur nung sorkar taseni iba ken o atema ajaki mulunga telemetba ka agitsü jangraba metetdaktsüogo aser iba jagi

JAC-AATB-i hopta ka tsüngda lisopur telok balala den ajurutepa asüngdangyaogo aser iba nung March 28, 2017 nü public senden ka amenba dena lir" ta JAC-AATB sangdong nungsa metetdaktsü.

Kin aser telok balala dang nungi tebilebantem lemsatepba sülen Charter of Demands ka renem aser ibaji JAC aser kin/telok lennirtemi mulunga agizükogo. Mulunga agzizükertemji JAC pusema nungiter lir aser parnokki Mizo People Convention, United Zou Organization, Simte Tribe Council, Tedim Chin Union aser Young Paite Association lir. April 2, 2017 nü Charter of Demands ji Chief Minister Pu N. Biren Singh nem agütsü, ta parnokisa ashi.

April 7, 2017 nü Chief Minister aser par cabinet den ajurutepa senden amendang Charter of Demands agütsü aser idangjibo Chief Minister-i takhangbatem mulunga agizük aser April

10, 2017 nü ajurutepa Memorandum of Understanding (MoU) atema jembiteptsü ashi. Ajisüaka, April 10 nü Manipur sorkari telatetba kar ashi aser itemji JAC-i takhangba agütsüba onük kar anema liasü, ta JAC-AATB-isa metetdaktsü.

Sorkarisa August 31 (Tribal Unity Day) ji state nung general holiday sangdongtsü memulung. Manipur nung tang BJP-i aniba sorkari district tasen tenet tentetba meyipa agitsü atema tebilemba mali ta sayur aser iba atema JAC-i district tem indang arrtsü khen meyipa reprangshimtsü aser nungdakba tesemtem nung district tasen kar tentettsü atema akhanger, ta parnokisa ashi.

Manipur nung Khristan lisopurtemi tasür nem akhüm agüja mang aremer, saka tribal tem anema bill asem benoka aliba meyipa magi tashi, tribal mang 8 maremtsü, ta JAC-AATB-isa metetdaktsü.



April 16, 2017 nü Odisha yimtiba, Bhubaneswar nung aliba Raj Bhavan nung Manipur Chief Minister, Biren Singh, Arunachal Pradesh Chief Minister, Pema Khandu, Assam Finance Minister, Hemanta Biswa Sarma aser Union Minister of State for Home, Kiren Rijju nungeri Odisha Angh, Dr.S.C Jamir ajurudang külemi tangokba noksa nung angur. Angh-i parnok pelaa agizükba atema parnoki pa dang pelaba lemsatet. Parnok tsüngda senden minute 30 shi amen. North East nungi yimtenren lenirtem ya anogo ananü BJP National Executive senden nung adentsü atema tang Bhubaneswar-i oa lir. April 16 nüsa BJP General Secretary (North East in-charge), Ram Madhav-ia Raj Bhavan nung Odisha Angh, Dr.S.C Jamir ajurua liasü. Bhubaneswar, April 16, 2017.

April 21 nü UNTABA-i Tzüdikong nung senden ayonger

Dimapur, April 16 (TYO): United Naga Tribes Association on Border Areas (UNTABA)-i akhidang nungi Naga nung sobaliba aser Assam den arrtsü telemtetba tajung ka dangi arutsü atema mera aika benoker achaayanga inyaka arudar, ta UNTABA sangdong ka ajanga metetdaksü.

Item nukjidong ataloktsü atema Tuli Area Joint Council Forum (TAJCF)-i ketdangsüa Hokolbarnü, April 21, 2017 nü Consultative Public Meeting ka Community Hall, Tzüdikong nung amentsü ayongzükogo,

koba ajanga Nagaland sorkar matsüngdang benoka inyaktüsü atema nüburtem tangatetba asadanga telemtetba agitsü aser ibaji mapang tetemsü nung tanga teloktem den benoka jembitsü.

Iba senden nung jembitsü tongtibang onüktem rongnung-Naga nung sobaliba aser Assam den arrtsü latetsü atema inyakyim aser iba onük dak sentakba nung stakeholders ajak den angatetepa onüktem nung ajemdaker telemtetba agitsü.

Anungji UNTABA-i Nagaland nung arrtsülen aliba

constituency ajak nungi nüburtemi shimba züngsemtem (MLA tem), arrtsü district tem nungi Civil aser Police ketdangsertem, arrtsülen aliba Magistrates, Naga Tribes Hohos nungi züngsemtem, Nagaland nung tongti tentettem nungi, arrtsülen aliba tesemtem nungi Village Council züngsemtem den GBs, UNTABA nungi Advisory Board, Executive Committee aser Action Committee züngsemtem ajak iba senden nung medema arua adentsü mepishia metetdaksür, ta sangdong nungsa shia lir.

Kohima nung 44buba KODH foundation day mungogo



KODH nung alir tanurtemi 44buba foundation day sentong nung ken ka ajanga shilem agiba noksa nung angur. Kohima, April 16, 2017.

Kohima, April 16 (TYO): Golden Jubilee benjungmung Easter Sunday anogomung, Deobarnü Kohima nungi kilometer 5 pilar aliba KODH nung Kohima Orphanage and Destitute Home (KODH) kum 44buba foundation day mungogo.

Iba sentong nung jembidang KODH Chairman, Neibanuo-i, "Kohima Orphanage and Destitute Home ya kütsü asür, Zaputuo-ii Angami-i 1973 kum iba anogo nung tentet, aser tanü April 16, 2016 nü kum 44 ajunger," ta metetdaksü.

Laisa, taruba kum trok nungbo (2023 kum) KODH-i

Golden Jubilee benjungmung Easter Sunday anogomung, Deobarnü Kohima nungi kilometer 5 pilar aliba KODH nung Kohima Orphanage and Destitute Home (KODH) kum 44buba foundation day mungogo.

Neibanuo-isa, tang iba Home nung alirtem parnok 93 lir ta metetdaksüba den külemi takum tanur teneti NBSE kübok Higher Secondary School Examination (HSSLC) tatidang agütsüogo aser tadidang result atadar, ta shisem.

Laisa, kum aika tsüngda iba Home den yaritepertem dang pelaba olen ka lemsatet.

Foundation day sentong nung KODH nung alirtemi iba anogomung indang temeja ken ka aten.

Helen Zaputuoii leniba nung

iba sentong agi aser John Zasituo-i tepela anküp o jembia liasü.

2016-17 kum atema Best inmate award ji tang Class 8 nung azünger, Mark nem agütsü. Pa kenübo doctor akumtsü nukjidong lir.

KODH tentetsang aser KODH Tir, Ama Zaputuo-ü Angami 2011 kum March 24 nü arishi kum 89 alidang alima nungi pilaa liasü. Asür Zaputuoü Angami-i mangdang tajung yur Kohima Orphanage and Destitute Home ya 1973 kum tenzük aser la asüba anogo tashi (kum 38 tashi) iba home ya achaayanga liasü.

KIDANG YARITEPER NÜNGDAKER

Sainik School Punglwa (Peren) nung kidang tanur reprangtsü atema teyariteper ka nungdaker. Mapa apir itasen agütsütsü.

CONTACT: 9436 809207 | 9862 542073

Moatsü Challenge

PENALTY SHOOTOUT TOURNAMENT

Organized by Luyong Students' Union

DATE: 02-05-2017
VENUE: Public Ground Luyong

ENTRY FEE
Rs. 1000

CASH PRIZES
1st Prize -Rs. 10,000/-
2nd Prize -Rs. 6,000/-
Best Goal Keeper -Rs. 1000/-

Iba asayamong nung sendakba maparen atema tongteprateptsü asoshi Contact No. 8974 264177 | 9774 625287

Kohima Police-i opium seret 9.5 apu



Kohima Police-i apuba nisung den opium aser inverter box noksa nung angur.

Kohima, April 16 (TYO): Deobarnü Nagaland-Manipur arrtsülen Khuzama nung aliba Inter-state Police Check Gate anüker Kohima police-i crude opium seret 9.5 puogo aser iba dak sentakba nung nisung ka puogo, ta police-i metetdaksü.

Opium ji inverter box telung nung miima bena liasü aser iba dak sentakba nung Mantripukhri, Imphal district, Manipur nung tang telidak nisung ka- Bihar, Begusarai district kübok Barauni yim nungi Kalicharan Das'er jabaso, arishi kum 52 tain,

Raj Kumar Das puogo, ta parnokisa ashi.

Tai tonglokja alisangji passenger gari ka nung Imphal nungi Dimapur leni aoe liasü, saka tanü nikongdang 1:30 meta Kohima Police-i gari sota mita reprangdang apu, ta police-isa ashi.

Police-i ashiba agi, iba mozi jagi heroin sa yanglur, aser ibaji International market nungbo sen crore aika jengjang lir.

Police-isa ashiba agi, tai tonglokja alisangji asung okadaki anir aotsü aser maneni bushisüngdangtsü atema mechioktsü.

Dimapur Police ajanga metetdaksür

Dimapur, April 16 (TYO): April 12, 2017 nü Dimapur Stadium nung nisung kar tim mesüi kazütepang Dimapur Police nungi kari parnok nem agüja aliba tashi dak alia inyakba aser police-i item video ji social media nung tatalokba ka lir, aser ibaji ozüing alema benshiba lir, ta tanü Addl. Dy Commissioner of Police/PRO, Dimapur, Nagaland-i sangdong ka nung metetdaksü.

Iba dak sentakba nung Dimapur Police-ia iba ama

innyakbaji memedentsür aser police kari tashi alia amshibaji aitsür ta jangjashitsür, ta sangdong nungsa shia lir.

"Iba dak sendakba nung item police nem temerenshi tapet agütsüogo aser mapa nungi anenja lir," ta police sangdong nungsa shia lir.

"Dimapur Police-i sensotem dang, onoki maneni nüburtem tajungtiba agi tenzüktsü merangtsü aser ozü züngsemtemi tim mesüi benshiba mesüra innyakbaji magizükttetsü," ta kasa sangdong ajanga metetdaksü.

All Bodo Students' Union-i sorkar amokmeren

Guwahati, April 14 (Agencies): Bodoland state balaka meshiba nung jenjang tasen ka agia, Brehostibarnü All Bodo Students Union (ABSU) aser tanga Bodo loktitemi 'Betrayal Day' ka ayongzüka among. Parnok takhangba sendoka toktsüra, hopta ka rongsen ketsüing lenmang nokdangba sentong ka ayongzüksü, ta parnok Centre sorkar amokmeren.

ABSU tir Pramod Boro-i ashiba agi, Centre nung aliba sorkari parnok aiben ashioktsüogo aser 'Betrayal Day' amongba ajanga BJP sorkar teyazü tenangzüka teyur. "Centre-i onok takhangba aser temepishibatem küm aika sendoka toktsüogo, anungji May 20 nü nungi tenzüka onoki rongsen ketsüing lenmang

nokdangba sentong hopta ka ayongzüka akatsü. Iba masüdang onoki April 20 nü ghonda 24 mokdanga liasü," ta paisa ashi. Peoples Joint Action Committee for Bodoland Movement aser National Democratic Front of Bodoland (Progressive) teloka Bodoland balaka meshiba nung teka amteper inyak tenzüko.

State balaka meshiba dak nungi alaka ano tanga takhangbatem rongnung, Bodoland meshiba tesem nungi pilar aliba Bodo nung atema yimden yimsüsüba nung temeden, Karbi Anglong aser Dima Hasao district nung aliba Bodo nung atema ST jenjang agütsü asoshi takhangba densema lir.

Boro-i ashiba agi, election mapang nung BJP teloki

tezüluba aser o agi parnok yimden yimsüsüba nung menden kümtetra, Bodo nung tebilemsü idangjisa tembangsütsü, ta nangzüka liasü. "Bodo nungertemi Parliament election nung BJP pusema liasü. Assam nung BJP-i menden 7 nungi 5 bo Bodo nung lakti teyari ajanga koka liasü. Aji saka tang tashi nung tenangzükatem kecha mapa küma inyakba mangur," ta pai shisem.

"Bodo nungertemi küm 50 tashi Bodoland state ka kümtetsü asoshi khanga arur. Iba takhangba ya Bodo nung sobaliba, maitsü aser ali temeden kümkzüka ayutsü asoshi, Brahmaputra tzüküm north len aliba aser iba temükazüki nungi pilar aliba Bodo nung asoshi temeden meshiba lir," ta Boro-i ashi.

Poila Boishakh Tripura nung among

Agartala, April 16 (agencies): Tripura yimtiba Agartala nung 'Poila Boishakh' amongba sentong nung, Bengali nung meyrejanga aika Temple-i oa sarasadema liasü. 'Poila Boishakh' ya Bengali nung küm tasen benjung lir.

Bengali Sakabdi-i ashiba agi, parnoki küm nung tetenzük anogoji kanga metsüingareta amonger. Küm tasen nung ki ajak kanga junga merükteta, naro aser tanga oset balala agi kanga junga sobutsür parnok tsüingrem 'Lakshmi' aser 'Ganesha' na agizüksü asoshi yongyaa atar. Iba anogo nung Nüburtemi süoshi tasen semer tsüingrem nungi temoatsü meshitsü asoshi temple-i aoer.

Iba benjung semdang Monimala Sengupta-i ashiba agi, "Bengali küm tasen mezüing anogo nung ni 'Narayana' tsüingrem dang ozü chirnur, aser adianutem atema anema aliba temoatsü meshia sarasademsü asoshi aru. Küm shia onok iba temple-i arur."

Küm tepiyong asoshi temoatsü meshia shishilembartemi Laxmi-Narayan aser Ganesh pooja agia mezüing anogo tenzüker.

Shishilembar Harisankar Saha-i ashiba agi, "Onok temple-i temoatsü meshitsü aser sarasademsü asoshi arur. Onoki shishilembaba nung 'account' kaket tasen tsüingrem tenüing nung tenzüker. Iba ya onok yimya lir." Yimya ka ama putir-i shishilembartem 'account' kaket nung temoatsü meshia 'Swastik' temaitsü ka sentsü temerem agi yanglutsür.

'Poila Boishakh' dang ya 'Noboborsho' taa ajar, kechiyong iba anogo ya Bengali calendar nung 'Boishakh' ita mezüingbuba anogo lir. Tripura den külemi 'Poila Boishakh' ya Bangladesh aser West Bengal nung benjung ka ama amonger. Maneni iba ajanga Bengali nung Tripura nung tamangba yimsü aser tesem balala ajanga bendangtsüba kecha tebandang melei sendaktepdaksür.

GST Bill ya Assembly nung May ita benoktsü: Himanta



tenzüka kisüing masü saka iba ajanga sorkar ketdangseba nunga temelenshi bener arutsütsü," ta Assam Finance Minister, Dr. Himanta Biswa Sarma-i ashi.

"State GST Bills ya Assam Legislative Assembly nung 2017 May ita akatsü aliba senden nung benoktsü," ta Minister-isa shisem.

Iba sentong nung Assam Finance Department indang Commissioner & Secretary, Dr. Ravi Kota-i pela agizükba o jembi aser Assam Commissioner of Taxes, Anurag Goyal-i GST sentong ya tatsü agi rasaa ashi.

Iba sentong nung Additional Chief Secretary to the Government of Assam, Finance Department, VB Pyarelal; aser Chief Commissioner of Central Excise, Customs & Service Taxes for North-eastern Region nungertema aden.

Iba sentong ya Commissioner of Taxes, Govt. of Assam aser Industry, Trade & Professional Association külemi GST inyakim nüburtem dang sayutsü asoshi ayongzü.

Guwahati, April 16 (Agencies): "Constitution nung inoksemba Goods & Services Tax (GST) bill mezüing Assam nung mapa küma inyak aotsü asoshi kanga pela bilemer," ta Guwahati nung aliba Pragjyoti ITA Centre nung GST-Manthan sentong nung shilem agiba mapang Revenue Secretary, Govt. of India aser GST Council nung Secretary, Dr. Hasmukh Adhia-i ashi.

"Central Goods & Services Tax Bill (CGST), Integrated Goods & Services Tax Bill (IGST), Goods & Services Tax (Compensation to States) Bill aser Union Territory Goods & Services Tax Bill (UTGST) bill

tem mapa küma inyak aotsü asoshi India Tir-i temelaba agütsüogo," ta pai shisem.

"GST Bill tem mapa küma aoba ajanga India ya tanga linük ama terenlok angutsü," ta Dr. Adhia-isa ashi.

"GST ya India nung nuchiso anguba sülen Tax tsütsü temelenshi tulutiba lir aser iba sentong ya sorkari ketdang süa nübur ajanga nem tesayuba aser tangazükba agütsütsü asoshi sentong ka state nung April, May aser June 2017 nung agitsü aser iba sentongji tanü ya mezüingbuba lir," ta Dr. Adhia-isa shisem.

"GST ya linük nung saru saruba nung temelenshi tasen

Kanga bulua manguba ango ka Kamalpur nung ngutet



Kamrup, April 16 (Agencies): Indian Ocean aser Western Pacific tzüim nung anguba ango tabu ka, 'Crocodile Fish' ya Assam nung Kamrup district kübok Kamalpur yimtsüing nung Utpal Kakati'er kishi nung aliba

tzübu nung apu.

Iba ango ya tepur tajung ango rongnung züingshir aser tzüim tulu nungang angur. Iba ango apuba ajanga iba tesem nung aliba nüburtem kanga süngmangtepogo.

Mapa nungi anentsüba ken o CM aruba sülen tembangtsü: L Jayantakumar

Imphal, April 16 (Agencies): Manipur Health & Family Welfare Minister L Jayantakumar Singh Honibarnü mapa nungi anenogo. Pa mapa nung meinperong aika aliba ajanga mapa nungi anen, ta pai ashi. Pa mapa nungi anentsüba dak sendakba nung maparen Mongolbarnü Chief Minister N Biren Singh state-i meyipa aruba sülen kümtetsü.

"Ni mapa nungi anentsü asoshi benokba maparen CM April 18 nü Manipur atongba sülen kümtetsü," ta Jayantakumar Singh-i osangbenertem dang ashi.

"Mongolbarnü tashi yimlibelema ataang, kechiyong CM-i tatempang telemtetba agitsü," ta paisa ashi.

Chief minister tang Bhubhaneswar nung BJP National Executive senden nung

adentsü asoshi oa lir.

Pa kechiba mapa nungi anener ta asüing dang, iba ken oji meim ken o ka lir, ta pai langzü.

NPP MLA Jayantakumar Singh March 15nü CM den külemi minister menden atema tenangzüka agia liasü, iba sülen ita ka lir pa minister menden nungi anentsü asoshi temelaba meshia shidi zülüogo.

Pa mapa nungi anentsüba atema temelaba meshia shidi züluba nung pai ashiba agi, "Ni kü mapa bilemba ama meinyaktetsü, kechiyong kü menden nung meinperonger aika lir."

Aji saka Chief Minister Nongthombam Biren Singh-i yashi ashiba agi, health minister mapa nungi anentsüba atema temelaba meshia shidi mesüra iba dak sendakba nung osang kecha mangu.



Agartala, April 16: Honibarnü Agartala nung Bengali Calender nung küm tasen , Poila Baisakh amongba mapang Putir kati shishilembaba kaket ka külemlküjaba noksa nung angur.



TIR YIMYIM

YIMOBILEM (EDITORIAL)

DIMAPUR MONDAY, APRIL 17, 2017

Nashi shi mechidaktsüner

India nung BJP teloki yimsü asüba state-tem nung nashi shi mayoktsü aser nashi shibelen masütsü ozüing agütsübaji parnok asoshibo tim dang saka nashi shi achirtem asoshibo timtem aser takoksa tulu ajurudagi. Hindu nungertemi nashi ya tsüngrem amato külemer, anungji nashi tepsetbaji tsüngrem tepsetba den kasa aser nashi shi achirtemji kenyongi tsüngrem metsübur amai parnokibo bilema alitsü südi. Ibaji meteta nashi shi achirtemia parnok akümtsüba nashi alepba aser nashi shi ayokba aser achiba yimyatem tazüokba nung amshitsübaji kanga tongtibang asütsü. Ajisüaka, India ama ka tamangba yimsü, kin kidong aser oshi zünger mezüingma aliba lima ka nung government-i chiyongtsü achiba tashi nung ozüing zünga yutsüra, ibaji India tilaba akümtsüsa inyak tenzükba mapa ka asütsü. Iba ama sentong aser ozüing jagi India telongjem raksatsü. Nashi shi ya shi rongnung tajung ka, temang atemabo ak shi dang nungia tajungba, anungji nübertemi kanga sapua achir. Ibayongji, alima nung tajangzük keta shishilembatetba shi rongnung nashi shi ya lir. Aji oda, nashi shi achirtem taji yutsür nashi shi ayokba agi kibong mesüa alir nisung aika lir. Ajisüaka, nashi shi mayoktsü aser shimebelentsü asoshi ozüing agütsü nungji nashi lepa shi ayoker dang masü saka nashi shishilembar aika mapa maka kümogo. Aji oda, ozüing aküm nungji, joko nashi shi ayoker aser nashi shibelenertem mita nokdangtsü asoshi telok shimteta yuja lir aser item jagi lenmang tashi nung mita atar. Tanü India nung India senso süaka nüchiso maka shi tashi government-i melaba shi dang achitsübaji timtem tulu lir. Atangji, Nagaland ama state nungbo nashi shi achir teimba aser government-a BJP government masü, anungji nashi shi machitsübabo ozüing agüja mali, ajisüaka Nagaland-i nashi bener arutsü lenmang mesüa akümtsü. Naga nung nashi shi achir tia ajung, tang tashibo Assam nung BJP-i aniba government liaka ano nashi shi mayoktsü tashibo ozüing agüja mali. Ajisüaka, tawato Jorhat tashi nunga nashi meiner oa alirtem merenshiba otsü asenoki angashiogo. Aji oda, Assam nunga nashi maleptsü aser nashi shi shimebelentsü ta lemtet nungbo Nagaland nung nashi shi angutsü tasak asütsü. Aji oda, tangbo Assam nung BJP kijai government mekümtetba agi tanga state nung latetba amabo melatetter asütsü, kechiyong tanga state-tem o North east nung aliba state-tem na libaliro ya balala, ajisüaka BJP mulungjang nung nashishi indang jembiba ya Northeast state-tem nunga latettsü temulungtetba alinung, parnok asoshibo tasakbo masütsü. Tang ya BJP government taginübaji kin ka, anungji sen tapu ka dang ta asüba amato, India ya kin ka anungji ozüing ka, kin ka anungji tamangba yimsü ka aser kin ka anungji saru saruba a kasa tapu ka dang India ajunga sarutsü tebilemba, tangatetba aser temulungtetba lir. Aji junger amato saka India ama ka nungbo senso ajak tamangba yimsü ka, ozüing ka aser saru ka kübok alitsübaji mapa tasak aser timtem aika lir. Atangji, India nung nashi melepdaktsütsü tebilembaji akhidang nungi Hindu nung nung tebilemba liasü. Iba jagiang tang dang masü saka center governmenti akhidanga merangdangogo. Aji oda, nashi kümzüka ayutsübaji linük temzüng tashi nung zülusema lir. Iba jagiang, tamasayongi Naga nungertemi India yimten kübok masü saka balaka aliang tajungba ta angatet aser yimten nüchiso atema nokdak. Tamalen nungi Naga nung nung yimten lenirtem tangatetbaji Naga nung nung India nung nung masü, kechiyong Naga nungertem ya Hindu nung nung masü, Naga nungertemi nashi shi achir aser Hindu nungertemi nashi külemer, Naga nung nung o Hindu nung nung na sobaliba balala. Ajisüaka, India-i Naga nung nung yimten balaka meyoknü, anungji mekümnüseti tanübo Naga nung nung India nung nung kümer lir, anungji Naga nung nung asoshi Nagaland tilaka ya dang masü saka India ajunga ya Naga nung nung lima asütsüla kechiyong Naga nungertemji India nung nung. Ajisüaka, India nung nung Naga nungertemi achiba chiyongtsü mechitettsüsa aser Naga nungertemi amangba yimsü sadema mamangtettsüsa kumadokba tensa mapang ya Naga nung nung asoshi tebilemdangtsü aser pei temeten asoshi tasü itta nokdakba mapang ka asütsüla. Iba olaji Nagaland Legislative Assembly nung, Lok sabha nung nung aser Rajya sabha nung chichiba Naga nung nung meimer Naga nung nung lira angashidaktsütsüla.

OLEMSABANG

Nagaland nung dennür mali asü ?

S. T. Yapang, Lkr. Kohima

Tawa Manipur assembly election agiba ajanga mapa agi Naga nung nung sünür aser o agi temoatsü aginüandang Naga nung nung sünür na jangjashiba mapang süogo. Ajidang masü Nagaland state ta tilaka jateter aliba nungia yiaki alirtemji yimdenren nung tajangzük aginüandang adianu amai züngshiba dangashi shitakba mapa agi dendaktsünüba mali ta puteter.

Khulitemji ya; March 11, 2017 anogo Manipur election sangdongba nung Naga nung nung ta jembia aruba nübu aser Naga nung nung ajungtsü tenzükba telok tenüing agi NPF nungi nisung pezü tashi adokba asenok ajaki metetogo, kasa Manipur nungjisa Tatar menden roker nungi BJP-21, Cong-28, NPF-4, NPP-4, LJP-1, AITC-1 aser IND-1 ta takok angu, yimden tashi abentsü asoshi nübu 31 nungtaker, saka shingaia mengutet nungji tang amala telok tila nungi adoker ket nungji shir telok nem sorkar kümdaktsünür tashi lir, aser parnok nübu ishika dang süaka parnoki aginübatem ataloktsütsü ta shia mesüzüker aser yamaji inyaker, saka Naga nung nung yimkong tia maka Naga nung nung ajungtsü kecha mejembi odang NPF tatar pezü den NPF tanishirtem parnok tebilembaji Cong telok samatsütsü dang sentong jagi melen, kechiyong iba amala inyakyim nungjibo rongsen tzümetsüing amai nunga arutsü, saka Naga nung nung ajungtsüsa jembi agibo yimden nung opposition dang asütsüsa akümtsü, asen lima election nung rongsen jenti lalur opposition-sa asütsüjia shibai aremetsü, saka yamaji kecha mesütettsübo tamasayongi Naga nung nung ajungtsü aser alima ka nung külemi alitsüji mejembi tajungba.

Manipur Election nübuyim nung BJP aser Cong anapronglai Manipur artsü memelenshitsü ta ajangajanga shiogo, anungji item o ashir telok den Naga nung nung ajungtsü tenzükba teloktemjibo madentsüba ato, saka tenüing agi temoatsü aginüandang Naga nung nung sünür dangashi ochi agi Naga nung nung sünüba melira tang amaisa ataloktsü.

Manipur nung nung yia alir denji putepa NPF tir aser Nagaland CM Dr. Shürozelle Liezietsu-i Manipur election osang sangdongli yongi "Northeast nungi Congress party agientsü asoshi tenangzükba nungi masetshir aser Manipur nung non-Congress teloktep mashi ka den NPF-i yariteptsü nangzük" ta shia angutsü, iba melena "shir teloki Naga nung nung ali ajak longjemer alima ka nung alitsü pelashiashia agizükdir par telokji pu asemetsü" ta sangoktsü asübo alima tatem tashi oa aliria Naga nung nung taginüba aser temeten jangja metetla aser Manipur nung Govt. metentettsüsa tia ka ajurua PR arula, iba mapang shitak nung Naga yimden keno jembia telemtetba tajung ka agitsü lenmang sadema lapoker süla. Saka tangari yutsür ajentsü ang tsübuseta arishiba ya koda tejashitsü!

Joko tangar bendanger, talisa anülulen alirtemibo Manipur nung nung yia alir Naga nungertemi Nagalimai ali bener adoka dennüba mesüra Nagaland state nung aliri arua dendaktsünüba khuli mangutsü, oda pei yimdaki mouteter rogo, aser pei tasoli nung sadema meliteti senzür ishika tejangraba dang mesüka tangaribo bilemetsü, aser aji agi yimden keno nunga tashi maittsü, kechiyong pei yimdak ali kimung ajak nüka saru moluk toka alir nübutemi Nagalimai ali bener adoka dennüba khuli mesayuteter, Manipur nung nung den longjemer aotsü dang aritepba mapa ajaki nguogo, anungji o jembiba o mapa na meputeper.

Manipur nunga süang Assam mesüra Arunachal ano Myanmar amala nung alir ajaki tang aonpo nung inoka sorutsü mebilemi Naga nung nung sünüba khuli tejangja sayutet asübo, ashiko Naga yimten keno asoshi mapa temelaba den tekaraba tembangla ta bilemer.

Aikati Nüchiso dak alema tanga telemtetba maginür, ajia pei taginüba balala asünungji tim dang, saka asenoki metettsükaji tang aliba state dang nungi jenjang tajungba ka danga ngutetra ajia junger, kechiyong kechi komaka asüyonga mesüra tezülutepba balala aika liaka telemtetba ka aliba jaki Nagalima balaka razüka moutettsü ta meshitettsü, aser ajibo meimchir sentong kija agi mataloktsü, saka Tsüngremer anogotong ka nung ataloktsü ta amanger, tatsütiba agi tang India ya China amala alima tulu ka den rara adok nung asen Nagalima ya asenoki India nungi pila mounüyonga parnoki meinzüka yutsütsü, kechiyong parnok asoshi asenok ya sang ka aser bonglang makaba ongken ka mesüka lir.

Ano külen Nagaland state telongzük nung alir kintem rongnungia anüdoklen alirbo parnok balaka razüka onüba ajaki meteta lir, anungji o agi bendentsü jembir, saka mapa agibo Nagaland nung dennür mali.

Nagaland tashi itdaktsütsü asoshi Naga nung nung tenüing atemer mulungtet telok jenti tenzük, yangji Naga Hoho temaba ka sür tenzük, saka tangbo iba telongjem nung Nagaland state nung alir dangbo Manipur state nung alir ang timba, anungji Nagaland state dak sentakba keno Nagaland state sorkar mesüra nübur shingaia parnok den melemsateptsü aser parnok telok tebang maitdaktsütsü ozüing agütsütsüba sürnung per ngur nokbang atsü ama, parnoki inyaksaba makok süshia inyaker, saka kibur dangjibo kecha meshiteter ta Naga nung nung timtem tia ka saka tebang o agibo tajung ta makmakshimakba tensa ka nung lir, yang nungi tongpoka aotsüji tasü aitsüba dak alaka tanga lenmang kangarabo mangur. Nagalima nunga dena alir anepalu mesüteter nung medennür kangshia dendaktsütsüjia tim masü nungji pei pei sasep nung ya dang mokteper ali tajungba ta mapa agi jungkai adoktsür.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger-i angateta agitsü mepishir

Northeast nung Easter Sunday kanga longsoa amung



Itanagar/Kohima/Shillong, April 16 (Agencies): Yisu Khrista-i alima alangzüksü atema tasü nungi shia aruba tamaisü atema amungba Easter Sunday tanü northeast nung kanga longsoa mungogo.

Northeast kübok Mizoram, Nagaland, Meghalaya aser Manipur nung Khristan million 5.3 shi lir aser tanungba Tripura, Assam, Arunachal Pradesh aser Sikkim state tem nunga Khristan tamanger aika lir.

Mizoram nung tanü Salvation Army indang band party telok balalai "Pa shia aruogo" ta asüba ken tema yimdong sema senzü.

Mizoram nung lanurtemi pei pei arogotem nung sunrise service ayongzuka agi aser ano Good Friday nungi parnoki lumiba sentong tembanga arogopurtemi sarasadem aser

tekülem sentong balala ayongzuka agi.

Mizoram Angh, Lt. Gen. Nirbhay Sharma aser Chief Minister Lal Thanhawla nati nübortem den Easter salem lemsatap.

Nagaland yimtiba nunga nisung meyrjang aika World War II cemetery nung adenshia Easter sunrise service nung aden.

Nagaland nung tamangertemi sentong balala ayongzuka aser aser Lord's Supper o thanksgiving feast nung shilem agi.

Nagaland Angh, P.B. Acharya aser Chief Minister Shurhozeli Liezietsu natia Easter salem osang metetdakja liasü.

Deobarnü Meghalaya nunga Khristantemi kinü tanurtem tzüsenba, shimo milen amer yimdong sema senzüba aser Easter entsü o

amtsük amshia Easter mungogo.

Khristantem teimba sür aliba state nung arogo balala nung sentong tululu ayongzuka agi aser Archbishop of Shillong Dominic Jala-i St. Dominic Church, Mawlai Parish nung Easter sentong len ania agi.

Meghalaya Angh, Banwarilal Purohit-i sangdong ka nung, Easter ji teimla indang benjung ka lir aser alima nung nisung million aika bendanga agütsüba aser tatok agütsüba benjung ajanga ajungmesor, ta ashi.

Chief Minister, Mukul Sangma aser National People's Party President, Conrad K. Sangma natia Easter Sunday tenung nung salem osang metetdaksü.

Meghalaya nung nütsung yongsük nung shilem 75 shi ka Khristantem lir.

Australia nung Muslim telok kati Khristantem amak

Sydney, April 16 (Agencies): Australia kübok Sydney yimti nung Muslim nung teimba sür aliba tesemtem nung Khristantemi Khristan tamaisü noksatem odia bener mesenzüksü atema tekümdangtsü osang metetdaksüogo.

Taoba hopta tu nisung pezüi Greek Orthodox Christian ka dak teka sangshi aser pa tekong

nung kangki ka azüka aliba endoktsü. Nisung pezü indang tereprangtsüji Middle Eastern nisungtem ama liasü.

Par pezü jagi tejak nung atzüng, teberem aser tapubang nung azük ta Greek Orthodox Christian jagi police dang ashi.

Iba mapang pa tetongi pa kümzüksü merang saka idangji Arabic oshi jembris tetsür anati

la dak teka sangshi aser metsü ta tetsür laia police dang ashi.

Nisung pezü jagi Yisu indang tenung sensatsü aser "Allah" den atishia jembji, ta Daily Telegraph osang ajanga metetaktüsü.

Baptist Pastor George Capsis-i ashiba agi, tesüiba ita 6 tashi Sydney nung trokben tashi Khristantem amaker.



Tuli, April 16, 2017 : Aitlenden Baptist Arogo Youth ministry-i Easter Sunday tenung nung Grace Rehabilitation Home, Tuli, nung alirtem den lanurtem sentong ka ayonga kanga temoatsü ngua monga liasü.

ANOGO ABEN TSÜNGREM DEN

KIBUBA TSÜBUBAJI SHISATSÜ TETENZÜKDAK

Kibuba tsüubajji shisatsü tetenzük lir. Saka sowari tashitemetet aser tesayuba sempar. A. Shin 1:7

Alima nung shisatsü; tapu aika lir. Tanü Tsüngrem nungi anguba shisatsü agi kanga anunga lir. Tsüngrem matenba shisatsü agi kija taküm, kibong, lokti, Arogo alima shirangdaksür. Iba shisatsü agi tanela taküm küli aika raksatsür, Ochi nungi piladaksür, Iba shisatsü yagi pei dang masü tangara Kibuba tsüubajji shisatsü akartema raksatsür. Tetenzükdak raksara koda tatem atongtsü. Babel lungki yanglur mesüka taküm, kibong akümtsü. (Lipok 11).

Tsüngrem tsüubajji shisatsü ajanga takok aser temoatsü angur, Pa medenra takok, temoatsüji mangur, mesangwa nung tashikang keter yima oadoktsü (A. Shin 23:5). Tsüngrem tsüubajji shisatsü ochi, temerük kobai ajak asoshi bilemer, inyaker taküm temerük, achi-aj em, sübosülem, libaliro taküm rangpeni Tsüngrem noksa sayur.

Kenü Mahatma Gandhi dang külem India lima nüchiso asoshi inyakerkem naia alima dang osang ka shiang ta ashi. Pai langzü "kü takümji kü Osang" Taküm rangpen agi India asoshi ali aser tenla. Ochi taküm. Naia/nia kechi noksa, kibong, alima nem doktsür?

Sarasadem

Kibuba, Na ama alitsü ni yariang. Amen



Deobarnü Mumbai kübok Kharodi village Malad(w) nung aliba Infant Jesus chapel Church nung tamangertemi Yisu Khrista kuryanglu ka inang tetsung nung tebang mesepa külemba noksa nung angur. (Mumbai, April 16)

America ya tamangertem linük ka lir : Donald Trump

Washington, April 16

(Agencies): America ya maneni tamangertem indang linük ka lir ta Deobarnü US President Donald Trump-i Easter osang lemsatepdang ashi.

Trump-i süia aoba benjung indang otsü lemsatap aser Yihuda nungeri masetshii nokdakba atema tenüngsang agütsü.

"Putu aika süia arudang, Yihuda nungeri reshikangshi ka madak ka ajangshia arur, saka parnoki item ajak kokteta aser jenjang tajungba nung liteta arur. Tanü Israel ji parnok tamang aser timtem koktetba atema nungshilung ka ama nokdaka lir" ta pai ashi.

"Easter Sunday nung Khristan temi Yisu Khrista shia aruba aser teti tatem makaba indang tenangzükba atema benjungteper. Iba anogo ya akhümtsüubajji aser külemba temeshi anogo ka lir. Iba mapang asen sotesem tamang ajanga linük ajungalen prokshir. America ya tamangertem linük ka lir" ta US President-isa metetdaksü.

"America ya tashitait linük ka lir kechiyong nisungtemi talenba kecha meli külemteter. Iba linük nung mezüng arurtemi ibaji nangzük aser asen tasütait nokinketertemia senso ajak atema iba tenangzükba kümzuka arur" ta paisa ashi.

Tamangba yimsü atema lendong tulutibaji kiralongraba lir ta Trump-isa ashi pai tawa Islamic State-i Egyptian Coptic tenlaki ana amakba aitsü.

"Iba tesempatsü mapa onoki kukua aitsür. Tasür kibongtem onoki mangyim tejashi lemsateper aser parnok nem tashi agüjang ta sarasademtsür. Tsüngrem taochi ajanga, tasüba madak takümi teti takok angutsü. Nüjiso ajanga talenba kokteter aser tamang ajanga tesübu samatsür" ta paisa shisem.

"White House-i nenok atema rarar. Onoki America nunger shia atema rarar. Senso ajaki lendong nungi kümzuka ayutsü aser yimjung nung alitsü atema onoki rarar" ta Trump-isa America nunger ayongzuka jembji.

OLONG PAITEP # 4394

1	2	3	4	5	6		7		8
9									
10							11		
				12					
13	14		15				16	17	
						18			
19					20		21		
			22	23					
24						25			26
	27					28			

TIPIEN

- 1. Makora (6)
- 7. ___ ai (3)
- 9. Mesakteti akumba (8)
- 10. Aroki (6)
- 11. Nü nung inokba süng (3)
- 12. Tebu senmang ayoksang (4)
- 13. Ola tatok/tasaden ta ashiba (6)
- 16. Italy yimtiba (3)
- 19. Pa meyong küma (4)
- 20. Yim anasa aliba tesem (5)
- 22. Tuoshi (6)
- 24. Densema (5)
- 25. Kechi amala ta asüngdangba (4)
- 27. Atakatem ato (3)
- 28. Kü indang asüsü ta küma ayuba (5)

LANGTSÜNGLEN

- 1. Tenüng maja (5)
- 2. Süngdong ali nung enok (___ m) (3)
- 3. Aika (5)
- 4. Nedi tebutsu dang ajar (3)
- 5. Semer anasü (5)
- 6. Süoshi junga masem (5)
- 7. Temalen nungi marur (5)
- 8. Ojang dang (5)
- 14. Süngdong nungi agizük (5)
- 15. Ajak osepogo ta ashiba (6)
- 17. Aotsu mela (6)
- 18. Su agi meyibanga (5)
- 20. Araksü amshiba tapu ka (2)
- 21. Tangar masü (4)
- 23. Mezüng zünya (2)
- 26. Memerüker temang nung aliba (2)

OLONG PAITEP # 4393 TELANGZÜBA

TIPIEN :

- 3. Auya, 5. Tekoro, 7. Yong, 8. Mata, 10. Asen, 11. Anentsü, 12. Lisü, 13. Ak-ki, 15. Ajak, 17. Indang, 18. Okar.


LANGTSÜNGLEN :

- 1. Atema, 2. Komo, 3. Aong, 4. Yongsük, 6. Tsüngi, 7. Yanü, 8. Molung, 9. Tasazük, 10. Asak, 14. Kanga, 15. Apir.

Agüja aliba olongtem bushiang

- IRELAND
- IRISH
- GOLD
- POE
- RAINBOW
- GREEN
- CLOVER
- LUCK
- SHAMROCK
- PATRICK

K	P	T	P	V	J	W	B	G	S
X	G	R	E	N	V	T	D	E	
X	E	E	U	G	V	M	I	Z	G
M	B	V	L	H	S	V	R	U	O
X	G	O	L	D	A	D	I	M	O
K	T	L	U	C	K	H	S	P	O
T	E	C	O	R	M	A	H	S	A
B	B	O	N	X	E	L	P	G	H
D	E	O	L	K	J	E	O	D	I
D	F	I	K	C	I	R	T	A	P
G	L	W	O	B	N	I	A	R	N
E	M	N	F	S	W	O	H	Z	V



TANÜBO NAI LANGZÜANG

Q: Tetsürtem kümzüka ayutsü atema "Operation Durga" koba state sorkari tenzük ?

- [A] Punjab
- [B] Uttar Pradesh
- [C] Madhya Pradesh
- [D] Haryana

(Taruba adok nung onoki langzüksü)

YASHI ADOK TELANGZÜBA : Australia

Tepela Tasoba Anogo

Tanur asoba anogo nung salem osang den noksa angai adokdaksünüra - Tenüng, Küm, School, Talidak & salem osang tejanga züür, noksa (photograph - any size) ka den anogo 3 mesüra 4 jela e-mail : tiryimim@gmail.com nung yokang mesüra Tir Yimyim bureau tem nung agüjang.



- 1. Tenüng :
- 2. Tasoba anogo:
- 3. Küm : 4. Class :
- 5. School :
- 6. Talidak :
- 7. Salem osang :

NAIA YA METETER MA



Alima nung merla maliba linükji Iceland kija lir. Merlai tashidak balala prokba ajanga kümshia Africa, South America, Central America, Mexico aser Asia linüktem nung nisung jenti asür.

SUDOKU # 3507

5			1	2					
9			5		8				
3	1	2	8	7	5		6		
	3	5			9	2	4		
	4				3				
8				9		7			
3	8	9	7		4	2	5	9	2
4		8	3	2	1	9	6	8	1
7	9	1	6			8	3	4	7

TELANGZÜBA # 3506

8	3	5	4	7	6	2	9	1
1	7	4	3	9	2	6	5	8
2	6	9	1	5	8	4	3	7
9	1	6	8	2	4	3	7	5
7	5	3	9	6	1	8	4	2
4	2	8	5	3	7	1	6	9
5	9	2	6	8	3	7	1	4
6	8	1	7	4	9	5	2	3
3	4	7	2	1	5	9	8	6

OJANG LUTEP # 4000

- MLAAI : □□□□□
- UNNG : □□□□
- MTGKÜÜNS : □□□□□□□
- PUMGON : □□□□□□
- NDMEEANGL : □□□□□□□□
- WRAA : □□□□
- AAALLB : □□□□□□
- GIA : □□□
- IRTMMMCHEEI : □□□□□□□□□□
- IKOSHRNG : □□□□□□□□

OJANG LUTEP TELANGZÜBA # 4399

KHRISTA TASÜ MADAK TAKOK ANGUBA
AJANGA TEIMLA TASEN KA AGÜTSÜR

Anü ita petinu ajanga alima nung tsungsang mopung melenshidaktsüba ama nisunger tia-a melenshidaktsür ta anü ita petinu tetzürtemi ashir, parnoki ashibaji shidak asü tai'ar nai-a na asoba ita anogo den tanü nü tia medemdangang (Horoscope):



Aries
21/3-19/4

Nüsasa nü dak temolung alemba shisatsü aliba ajanga nai mapa aika nung takok angutsü. Saka pei sasa pei dak tali temolung alembaji majung ta metetang.



Taurus
20/4-20/5

Tanü nai mapa tajung inyaktetba nisung aikati memetettsü südi. Anungji nai tangar den sensaksem liang aser iba ajanga na asoshi tajangzük angutsü.



Gemini
21/5-20/6

Nai inyaktetba mapa ajunga nung tenüngsang angutsü südi. Saka tanübo nai mapa tali meinyaki anisungzuka alitsü sentong yangluang.



Cancer
21/6-22/7

Mapa nung takok angutsü asoshi nai kanga jangrar saka item mapatem timba na asoshi masü saka tangar atema lir. Anungji nai mapa inyaktetba lokti aser kibung bendanga inyaktetsüla.



Leo
23/7-22/8

Nü dang temaba jenjang nung alirtemi inyaktetba dang nungi nai inyaktetba mapatemji tuluba ama meblemetsüla. Iba ajanga teraksa bener arutsür ta nai metetang.



Virgo
23/8-22/9

Tanü nü mapa inyaktetsü asoshi mapang peria angutsü. Anungji nai kechi mapa inyaktir, tajungtiba nung inyaktetsü merangang.



Libra
23/9-22/10

Na meketa aliba tzü-mopung tajungba kümdaktsütsü asoshi nai mapa kar inyaktetsü jangratsü aser iba ajanga nü dang temaba jenjang nung aliba nisungtemi kanga pela-a agizüksü.



Scorpio
23/10-21/11

Nü mapa nung takok angutsü asoshi meranga inyaktetba ajanga na tangar den rarapangsen madoktsü. Aser tangar den kanga kümdangta jembishinüang.



Sagittarius
22/11-21/12

Tanü na anisungzuka alitsü aser nü mapa kanga keraa tempangtsü südi. Nisung aikati nüdak tamajung ajitettsü südi, saka nai item asoshi shisabolua meblemetsüla.



Capricorn
22/12-19/1

Nai inyaktetba mapa nisung aikati meteta lir anungji na shisa tebulu. Saka nü mapa agi nisung kar poatsü bilemra, nü sempet tajungtiba amashia inyaktetsüla.



Aquarius
20/1-18/2

Nai mapa takok angutsü asoshi tasü ita inyaktetba saka nisung tai den inyakra na lendongi ayitsü. Nü mapa nung temolung agüjang aser tangar den sensaksem liang.



Pisces
19/2-20/3

Lokdi asoshi nai mapa tajung inyaktetba nisung aikati memetettsü südi. Anungji nü mapa nung temolung tali agütsüba tajungba asütsü.

Zubeen Garg nem Hindi ken metendaktsü



New Delhi, April 16 (Agencies): Assam nunger nungntugu kentener Zubeen Garg-i "Bihu stage" ka nung Hindi ken atenba atema sentong ayongertemi anendaktsüba sülen stage toktsür luadok.

Iba tatalokba ya Hokolbarnü aonung liasü. Stage metoktsü tsungda kenteneri sentong ayongertem

dang kentener kati kechi oshi nung ken tener atentsü ta shia asaloktsü. Iba ama tim masüba o ashiba ya jangja jangjaa local channel tem nung angashia liasü ta osang ka ajanga metetdaksü. Item channel temi iba sentong Live sayua liasü.

Garg aija sentong ayongertemi ashiba agi, pai Hindi ken matentsü ta molungteper liasü. "Iba event

manager-i pa stage-i mato tsungda pai Bihu stage ka nung Hindi ken matentsü ta tenangzükba agütsü," ta Noonmati Bihu Sanmilan tir Madhu Ranjan Nath-i ashi.

"Pai iba tenangzükba raksa aser iba ajanga onoki kentenba anentsütsüsa aküm. Onok-i oshi kecha manemer saka Bihu stage ya Hindi ken atentsü asoshi masü," ta paisa ashi.

Garg-i sentong tetenzükdang Assamese aser bihu ken kar aten aser iba sülen pai Krrish 3 film nungi 'Dil Tu Hi Bata' ken atentsü tenzükdang anendaktsü. "Parnoki kechiba kenteneba anendaktsüar ni mangateter. Hindi ya asen linük oshi lir.... Hindi, Assamese, Bengali aser ano tanga oshi kar; item ajak Sanskrit nungi dang poktet," ta pai tatsüka lir ashi.

Film nung shilem tajung ka angutsü kanga tasak: Swara

Mumbai, April 16 (Agencies): Swara Bhaskar-i 'Tanu Weds Manu' aser 'Anaarkali Of Aarah' nunger amala film nung kanga junga shilem agiba ajanga ajaki kanga sapua aküm. Aji saka lai ashiba agi, Bollywood nung ainer ka ama dang bilemer kechiyong iba industry nung kanga keraa tangar nem pei nung jangjaa kümdaktsütsü ya kanga tasak lir.

"Iba industry nung takok angutsü ya ajak asoshi kanga melarabo masü. Ni anogo shia kü mapa nung timtem ajurur. Ya kanga dang tasak lir. Ni tang tashi ainer ka ama dang bilemer. Shilem tajung ka angutsü ya kanga tasak lir," ta Swara-i ashi.

La jilushiba yimya ajaki temolung süa agizükaka Swara-i ashiba agi, 'commercial' tsütsüa takok angutsüji kanga tongtibang lir.

Swara-i shilem agiba taoba



film 'Nil Battey Sannata' aser 'Anaarkali Of Aarah' na prongla ya tetsürtem dak ajemdaker yangluba film tem lir. Lai item amala film tem nung shilem agiba ya yimya ka masü saka iba ajanga India nunger film industry nung temelenshi tulu ka bener arutsüba angur.

"Tetsürtem dak ajemdaker yangluba film tem kanga renlokdar aser item film tem ya

production company tulutemia inyaktetba. Amitabh Bachchan nunger amala kanga dang nungntugu actor-i 'Pink' aser 'Piku' nunger film amala nung shilem agir aser ano külen ni amala kati 'Anaarkali of Aarah' film nung shilem agir, iba ajanga yamala film ya yimya ka dang masü saka temelenshi ka adokba sayur," ta laisa ashi.

'Fast and Furious' movie tem yangludang oset raksaba jenjang million \$500 dak tema lir

Beijing, April 16 (Agencies): "Fast and Furious" movie 8buba Hokolbar nü sayaogo. Iba movie nung nungntugu gari arishetepba shilemtem, gari tsükokba aser apokba jangratemtsü shilemtem aliba ajanga iba movie-i sen aika ajangzüksü asoshi imlar.

Aji saka tang tashi nung film yangludang 'classic' gari aser 'super car' tem raksaba jenjang sangdonga mali.

InsuretheGap.com-i iba film 7 tashi yangluba nung oset raksab jenjang asadanga nung nguteteba agi, sen million \$541 liasü, ta osang ka ajanga metetdaksü.

Film nung shilem agirtem rongnung timtiba raksasangji villain Deckard Shaw (Jason Statham) liasü. Pai sen million \$180 jenjang oset raksa.

Mezüngbuba film nungbo

oset raksaba jenjang million \$1 dak nungi tajemba liasü, saka film 5buba tashi nungbo oset raksaba jenjang million \$100 ajung.

Film 7buba nung sen million \$300 alang garitem raksaa liasü. Item garitem rongnung alima nung tasaktiba gari rongnungi gari ka densema liasü. Tawa sayaba film nunga ano teraksaba jenjang tali ajungketsü ta imlar.



Mumbai, Apr 16 : Deobarnü Mumbai nung International Indian Film Academy Awards(IIFA) indang 'Voting Weekend' sentong nung shilem agirtem Bollywood actors Alia Bhatt, Diya Mirza aser Shilpa Shetty nunger külema noksa nung angur.

TAN HOPTA ATEMA - KOMA SÜLA ?

Q. Nagaland nung national aser state highways ya PWD-i masü private company - tem nem reprangdaksü nunga koma süla?

Olong 20 shi nung April 21, 2017 tashi nung iba telangzüba ya onok dangi

e-mail - tiryimyim@gmail.com mesüra SMS - 9856121232 / 9436072422 mesüra Tir Yimyim Facebook account ajanga yokang. Telangzübatemji taruba Hokolbar nü adoktsütsü.

Pasasa aniba garitem tendangtsü asoshi Apple nem temelaba agütsüogo

San Francisco, April 16 (Agencies): California nung pasasa aniba garitem tendangtsü asoshi temelaba agütsür rongnung Apple tensemogo, ta ketdangsertem osang ajanga metetdaksü.

Pasasa aniba gari yanglutsü nükjitung aliba olen ka Apple company nung tekolakba, Tim Cook-i shisema lir saka company ajanga osang tejanga kicha shia mali.

Taoba küm Apple ajanga sorkar dang pasasa aniba gari yanglutsü asoshi temelaba meshia shidi züluba mapang item garitem yanglutsü asoshi senotsü aika indoka bushisüngdangba indang shia lir.

California nung aliba Apple company ajanga software yanglutsü aser iba company den



'research centre' tasen ka San Francisco nung amenloksü atema sen million \$14 indoktsü aser mapa tasen 1,100 adokdaksütsü, ta sangdongogo.

General Motors indang Cruise Automation unit-i California, Arizona aser Michigan tesemtem nung item gari tendangba mapang ka lir.

Pasasa aniba gari yanglutsü asoshi gari yangluba company Ford, Nissan, Mercedes-Benz aser Toyota temia bushisüngdangba mapang ka lir. Uber aser Alphabet telokia yamaji bushisüngdangba mapang ka lir.

'Mobility innovations' aser technologies asoshi Continental-ia tawa 'research centre' ka Silicon Valley nung amenloka lir.

külemi inyakba company ajanga gari yanglutsü yimlar.

Gari yangluba company aser technology telok aikati pasasa aniba gari yanglutsü asoshi kanga meranga maparen balala inyaktepba mapanga lir aser 2020 tashi nung takok ngutettsü yimlar.

Iba amala gari yanglutsü asoshi General Motors indang

Kaizala Android App ajanga Andhra nübürtemi CM den sendakteptsü

April 16, 2017 (Agencies): Smartphone ajanga 'app' ka angati agi download asüba ajanga Andhra Pradesh nung aliba nübürtemi Chief Minister N. Chandrababu Naidu den indang indanga sendakteptettsü.

Nübürtem teinyaktsü ajak agi, parnok phone tem nung 'Kaizala' app install asütsü nüngdaker. Iba angat agi download asüba mobile 'chat app' ya Microsoft-i yanglu aser iba ajanga mapang ka nung nisung aika sensaksemeter.

Iba 'app' ya Chandrababu Naidu kisüng-i dang

amshitettsü. Nübürtemi iba ajanga Sorkar sentongtem ajungkettsü asoshi pie tebilemba aser timtembatem lemsateptettsü.

Nübürtem tebilembatem Naidu-i asadangtsü aser iba dak ajemdaker nübürtem tajangziük asoshi sorkar policy tem tajungba küma yanglushitsü, ta CMO nungi osang ka ajanga metetdaksü.

Nübürtemi anogoshi ajuruba timtemtem; pension, ration, tzi amala aser ano tanga timtemtem CM-i angadanga kechi department nung item timtemtem ali, itemji asadangtsü.

'Siri' mesük Facebook-i sentong tasen ka yangluba mapang lir

New York, April 16 (Agencies): 2016 küm Facebook indang CEO Mark Zuckerberg-i yanglutetba 'Jarvis' ama 'Artificial Intelligence (AI) assistant' tasen ka yangluba mapang ka lir.

Iba sentong tasenba dang ya 'Facebook M' ta ajar aser iba AI ya Facebook indang Messenger app nung keta lir.

Apple indang AI assistant 'Siri' ama 'Facebook M' yagi teyari balala agütsütsü aser Siri dang tajungba aser mapa timba inyaktettsü, ta osang ajanga ashir.

Facebook M ajanga

company balala den tongteprateptsüba aser südoksünema senzütsü asoshi ticket jelia mükazüka ayutsü akoker.

Facebook Messenger amshir nisung billion 1.2 lir aser item ajunga nem iba app tasenba ya agütsütsü tamakoktsü asüba ajanga 2015 küm nisung meyirjang ishika nem amshidaksü.

Iba app tasenba ya takok ngua yangluteta lir saka iba app ka yanglutsü asoshi sen aika indoktsüsa akümba ajanga Messenger amshir ajunga nem agütsütsü kanga tasak lir, ta osang ajangasa ashir.

Snapchat amshitsü asoshi India kanga sensaker: CEO



Mumbai, April 16 (Agencies): India nung Snapchat download süa amshir timba akümba mapang ka nung iba sapang tuluba küma odoktsütsü asoshi India ya kanga sensaker lir, ta Snapchat indang CEO-i ashir.

2015 küm iba app renlokba indang jembiba senden ka nung Snapchat indang CEO, Evan Spiegel-i

iba o ya ashir. Snapchat nung mapa inyaker kati India nung iba app amshir timba akümba ya kanga meilongi renlokba idang asüngdangba mapang, mapa inyaksang indang o meshitemdang, "Iba app ya takar atema dang lir aser iba sapang ya India aser Spain

senden ka nung Snapchat indang CEO, Evan Spiegel-i

mali," ta Spiegel-i ashir.

Shishilembaba nung India ya kanga karaa renloka aoba mapang ka lir aser internet amshiba nung India ya 2020 tashi nung shilem 2.5 agi tali renloktsü yimlar. Aser iba ajanga Amazon, Uber, Masayoshi Son aser Jack Ma company tem ajanga India nung sen dollar billion aika indoker.

Spiegel-i iba o ya shir senden nungi ayazüka alu, ta osang ajanga ashir.

Osang ka ajanga ashiba agi, taoba küm India nung Snapchat amshir ya million 4 liasü aser anu timba kümer alitsü südi ta yimlar. Whatsapp amshir ya India nung million 200 tajunger dang lir.

Airtel-i postpaid subscriber tem nem data angati agütsür



New Delhi, April 16 (Agencies): Reliance Jio den tokteptsü asoshi Mobile operator Bharti Airtel-i parnok indang postpaid subscriber tem nem high-speed data angati agütsüdar.

April 30 nü tashi nung 'My Airtel' app-i login asüba sülen nungi post paid subscriber tem nem angati data GB 30 tashi agütsütsü.

Subscriber shirnok taoba ita tang agütsüba offer mesükba data GB 10 angati agi angutsüba nung züngsema lir, parnoka iba offer tasenba nunga züngsemettsü, ta compang otongdar ajanga metetdaksü.

Iba den bendenloka Airtel-i ashiba agi, customer tem shirnok 'international roaming pack' shidak inoka mali, parnok asoshia offer agütsütsü.

Tatishitsü agi, Airtel subscriber ka ainlen senzüdang amshitsü asoshi pack shidak meinoki senzüa alidang parnoki anogoshia amshiba nung sen 499 dak tali amshira Airtel-i taa kecha magi-i sen 499 pack idangjisa activate sütsütsü. Iba pack nung unlimited incoming calls, free data, SMS densema lir.

Iba osang 'mail' ajanga Airtel-i postpaid customer tem nem metetdaksüdar.


Taoba ita isheka tsüngda

nung Reliance Jio-i offer balala agütsüba ajanga shishilembadak tanga company temia parnok customer tem mesamadaktsütsü asoshi sentongtem renema customer billion 1.12 dak tali nem offer balala agütsüdar.

Jio-i yaküm angati o jembitsüba aser data agütsüba sülen parnok nem taa agüja Jio network amshir subscriber million 72 jungogo.

India ya China sülen alima nung telecom shishilembadak tulutiba rongnung tanabuba lir. Indian telecom market asadangertemi ngutetba agi, taruba ita tem nunga iba tetoktepba kanga sashia alitsü.

Alima nung tantsütila Emma Morano süogo



Rome, April 16 (Agencies): Alima nung tantsütila aser 19buba putu nung asortem rongnungi tatembangtila, Emma Morano arishi küm 117 nung Italy Verbania jila nung Honibarnü süogo.

Emma Martina Luigia Morano shiba Arishi küm 117 aser anog 137 iba lima nung liasü, la 1899 November ita 29 nü Italy, Civiasco jila nung soa liasü. La ya arishir kibong ka nungi lir. La tetsü aser tetsüanatsü na prongla arishi küm 90 dak tema liasü aser la teyi Angela arishi küm 100 tashi liasü, ta osang ka ajanga metetdaksü.

Lar semchir ajanga ashiba agi, lai alima rangben rara anaprongla ajangshiogo, iba den külemi Pope 11 aser Italy tir 12 meteta liasü. La süngjem süngjema asüba osang semchir ajanga shisem.

"La taküm tangar dang nungi balaka liasü. Onoki la tejakleni aotsü asoshi tashi aser timtem lendong ajak koktetsüba yimya bener aliba teti belimtettsü," ta Verbania indang Mayor, Silvia

Marchionin-i ashir.

Yamaji arishia liaka la taküm nung timtem aika ajurua aruogo. Lai lar kinunger parnok 8 tashi ajateta ali. Alima rangben rara mezüngbuba nung la tetong süadok aser iba sülen la mezüngmeshia amshiba nisung ka den kibong küma liasü, shiba lai memeyim, ta osang ka ajanga metetdaksü.

Maneni la kinungbo den mebala tsüngta lar tanur ka dang aliba süadok aser iba sülen la kicha dang liasü aser küm 65 tashi 'Jute factory' ka nung inyak.

La chiajema yimya nung kanga dang tesüngmangtsü kaji, anogo shia küm 10 tashi lai entsü tazü asemsem chia liasü.

La doctor ajanga ashiba agi, lai süngolemba kangabo mechinü aser timba ka amtsük dang chia liasü.

2011 küm la nem 'Order of Merit' award agüja liasü, aser la tesüsabuba tasoba anogo amondang linük nung Tir, Sergio Mattarella aser Pope Francis nungi tenüngsang osang agüja liasü.



Bhubaneswar, April 16, 2017: Deobarnü Odisha yimtiba, Bhubaneswar nung Ato kilonser, Narendra Modi-i Odisha state nungi linük nüjiso atema rarar kinüngertem nem tetushi agütsüba noksa nung angur. Kasa noksa nung sa Odisha Angh, Dr. S.C. Jamir-a angur.

Muslim quota atema Telangana assembly nung bill agizük

Hyderabad, April 16 (Agencies): Deobarnü Telangana state Assembly nung backward Muslims atema menden shilem 12 aser Scheduled Tribes (ST) atema menden shilem 10 wazüka yutsütsü asoshi bill ka agizükogo. Tanü atema BJP züngsem pongu assembly nungi anenja liasü.

Bharatiya Janata Party (BJP) züngsemtemi bill anaprong anema senden nung longkak aita liasü, ajisüaka tanünga opposition party temibo Backward Class, Scheduled Castes aser Scheduled Tribes Reservation Bill, 2017 ji agizük. Iba bill nung maneni o lemteptsü aser state legislative council nung agizüktsü.

Tanep assembly senden tenzükba sülen Chief Minister K Chandrasekhar Rao-i

Muslim nunger rongnung Backward Classes (E) category kübok aliba nürtem nem tang menden shilem 4 agüja aliba nungi shilem 12 tashi kümtsütsü atema bill benoka liasü. Ano Scheduled Tribes nisungtem atema shisaliok rejutem aser sorkar mapatem nunga shilem 6 agüja aliba nungi shilem 10 kümtsüogo.

State legislative council-i iba bill agizükba sülen maneni iba bill ya Constitution 9th Schedule nung züngsemtsü atema Tir dang mepishitsü.

Iba bill nung o toktepdang Chief Minister Chandrasekhar Rao-i, Telangana-i mepishibaji Centre-i magizükra state-i Supreme Court matsüngdang benoktsü, ta metetdaksü.

Rao-i, "Joko küm 20 dak tema Tamil Nadu nungbo reservation shilem 69 dak tema

benoka inyaker. State pongutrok shii reservation shilem 50 dak tema agutsür. Süra kechibaji Telangana nembo magütsütsü?" ta ashi.

Supreme Court-i Centre aser state tem naprong nem reservations shilem 50 tashibo agutsütsü atema latetja lir.

Chief Minister-isa, reservations ya tamangba yimsü mesüra kinkidong nung ajemdaker masü saka lokti aser rongsenkettsüing jenjang nung ajemdaker agütsür, ta ashi.

Iba ya state atema putiotsü anogo ka lir, ta shia Rao-i, election mapang nung Telangana Rashtra Samithi (TRS)-i Backward Classes (E) aser Scheduled Tribes nem menden wazüka yuja aliba shilem timba kümtsütsü ta nangzükba liasü aser ibaji tang ataloktsüogo, ta ashi.

Pakistan-i UN nem Jadhav indang osang metetdaksütsü

Islamabad/New Delhi, April 16 (Agencies): Pakistan-i India senso, Kulbhushan Jadhav-i telungpur mapatem aser itangitba mapa inyakba indang osang renemdar aser parnoki iba osangji UN aser Islamabad nung aliba bendang linüktem nungi ketdangsertem nem agutsütsü, ta osang angazüker.

Tang renemba osangji tamalen Jadhav-i Field General Court Martial matsüngdang kuli agütsüba aser jembiba otem lir, aser iba nungji pai Karachi aser Balochistan na

nung itangitba mapa inyakba densema lir, ta kasa osang ajanga ashi.

Item kuli kakettem nungji Court Martial General-i agütsüba osang aser court nung ken o akaba osangtema lir.

Arishi küm 46, Jadhav anema Pakistan Army Act (PAA) kübok Field General Court Martial (FGCM) ajanga ken o akaba sülen pa nem tasüba temerenshi agutsütsü obendang agütsü. Taoba hopta Army tongti, Gen Qamar Javed Bajwa-i iba osang jangjatsüogo.

"Item kulitemji Islamabad nung aliba ambassador tem nema agütsütsü" ta kasa osang ajanga ashi. Kasa kuli kakettemji United Nations aser International tentet balala nema agütsütsü, ta parnokisa ashi.

Hokolbarnü Indian High Commissioner, Gautam Bambawale-i, Jadhav nem tasüba temerenshi obendang agütsüba anema parnoki mepishitsü, ta ashiba den külemi iba ken o nung Pakistan dang pa aitsüba kulitem aser army court tetuyuba kulitem meshiogo.

SIT-i taoba Goa CM Kamat jaoker

Panaji, April 16 (Agencies): 2013 küm ozüing alema 'iron ore' atuba ken o nung Goa Branch, Special Investigation Team (SIT)-i taoba mapang Goa state Chief Minister, Digambar Kamat dang parnok matsüngdangi arutsü jaokogo.

"April 18 nü SIT matsüngdangi arung ta taoba chief minister Digambar Kamat nem metetdaksüogo," ta Superintendent of Police, Goa crime branch, Priyanka Kashyap-i tanü osangbenertem dang metetdaksü.

Iba ken o nung tang agi tanabenbuba Kamat jaoker. 2014 küm February ita nunga SIT-i Kamat jaoka pa dang asüngdangyaa liasü.

Crime branch ketdangser kati ashiba agii, Goa Mines & Geology Department nung taoba mapang director, Arvind Loliengar-a kasa anogo nung jaokogo.

Iba ken o nung 2014 küm March ita nung SIT-i Loliengar pua liasü, saka tangbo pa bail nung chioka lir.

Justice (retd) M B Shah Commission osang ajanga

ashiba agi, 2005 küm nungi 2012 küm tashi nung Goa nung ozüing alema sen crore 35,000 jenjang 'iron ore' tua liasü.

Iba dak sentakba nung 2013 küm July ita nung Mines and Geology Department-i iba maparen nung densema alirtem anema ken o benoktsü atema inyak tenzük.

Iba sülen 2013 küm August ita nung crime branch-i Shah Commission aser tanga committee temi benokba tenüngtem densema Kamat aser Loliengar nunger anema FIR ka benoka liasü.

Iba FIR ji IPC sections- 120 (b) (conspiracy), 166 (public servant disobeying law), Prevention of Corruption Act kübok section balala, Mines and Minerals Development Act, Mineral Conservation and Development Rules aser Goa Prevention of Illegal Mining Transportation, Storage of Minerals Rules 2004 nunger nung ajemdaker benoka liasü.

Item ken nung ajemdaker ibaji bushisüngdangtsü atema taoba sorkar, BJP-i SIT ya tenteta liasü.



Lucknow, April 16, 2017: Deobarnü Uttar Pradesh yimtiba, Lucknow nung Khristan yimsü amangertemi Easter benjungmung nung shilem agiba noksa nung angur.

2019 küm nunga BJP-i Modi lenir aginer

Bhubaneswar, April 16 (Agencies): BJP-i aniba NDA sorkari sensakertem atema inyakba tenüngsanga Deobarnü BJP-i, 2019 küm nunga Ato kilonser, Narendra Modi leniba nung sorkar akumtsü atema yaridaksüner, ta nürtem dang mepishiogo.

Odisha nung anogo ananü BJP National Executive senden amenba mapang nung renemba party bangzüng nung, "Tesüiba küm asem tsüngda Ato kilonseri kanga meranga inyakogo, pai jembiba ama mapa agia inyakogo aser nürtem melungjang koktetogo," ta shia lir.

Kasa bangzüng nung, "Maneni terenlok alitsü aser mapatong tajungtem maneni inyaksü asoshi 2019 küm nunga Modi lenisüba nung sorkar akumtsü atema tenangzükba agitsü asoshi BJP-i nürtem ayongzüker," ta shia lir.

Ajisüaka bangzüng nungji

Ram tekülem ki, Article 370 aser Uniform Civil Code ama BJP indang tongtibang onüktem atemabo shia mali. Iba dak alia senden nung nashi tepsetba onüka süoka mejembi.

Osangbenertem den jembidang Union HRD Minister, Prakash Javadekar-i, tesüiba küm asem tsüngda BJP-i aniba NDA sorkari India linükji terenlok lenmang nung kanga karaa anigo, ta ashi.

"Tang alimai India dak ranglokdar. Terenlok aliba limatem nungi tongtibang osangtem aser asadangtetbatem ajanga, India ya lenmang aika aliba linük ka lir ta ashir. Alima nung linük ajak den India tesendaktep junga kümogo. Shishilembaba, tesendaktep aser amalitep sabang nung India jenjang junga kümogo. Item temelenshi ya linük nung sorkar tashi tait ka aliba ajanga lir," ta paisa ashi.



Pakistan nung aliba okadak kati India senso, Kulbhushan Jadhav nem tasüba temerenshi obendang agütsüba anema April 16, 2017 nü Mirzapur nung longkak aitdang ABVP züngsemtemi Pakistan Ato kilonser, Nawaz Sharif indang noksatem rongdokba angur.

US Tatong Tir Seoul nung lir; N. Korea atema jembitsü



Seoul, April 16, 2017 :- Deobarnü U.S. Tatong Tir Mike Pence (abelen)-i Seoul, South Korea nung aliba 'National Cemetery' nung teronem menemba long arongba noksa nung angur.

Seoul, April 16 (Agencies) : US Tatong Tir, Mike Pence Deobarnü South Korea tonga lir aser pa yangi anogo asemnü monga North Korea-i lendong agütsütsü aliba metetdakja security akangshitsü indang jembitsü, ta ketdangsertemi ashi.

Seoul nungi kilometer 70 pilar aliba Pyeongtaek nung US indang tayimtsü anenba tesem atongba sülen Pence Seoul nung aliba 'National Cemetery' oa, 1950 nungi 1953 tashi Korea nunger rara nung yaritepba tali shisadaksütsü asoshi semdangtsü, ta osangbenertemi ashi.

Tang Korea peninsula nung mepetmesü adoka aliba mapang ka nung January ita Tatong Tir akümsang Pence-i tan mezüngsüa Asia semdangberba lir.

Deobarnü Pyongyang-i ballistic missile ka tendangba takok mangu aser ano parnoki nuclear tanga ka tendangtsü renemshiba mapang ka nung US-i Kim Jong-un dang tashi sayutsü asoshi Korea nunger

tzü tashi 'aircraft carrier strike' telok ka yokogo.

Honibarnü Pyongyang nung military parade aliba mapang North Korea-i intercontinental ballistic missiles asem tashi sayua liasü.

Pence-i Hombarnü South Korea nung Tir mapa khen atema benloka alisang aser tang Ato Kilonser teinyakdak Hwang Kyo-ahn aser National Assembly Speaker Chung Sye-kyun na den ajuruteptsü.

Pyongyang-i nuclear amshiba anendaksütsü asoshi linük ana lokteper North Korea den agatetteptsü merangtsü mesüra tenokdangba kar agütsütsü, ta osangbenertemi ashi.

Pence-i Hwang dang North Korea indang inyakyim-a rasaa ashitsü akok aser Korea peninsula nung 'US missile defence system' tamenokdak aliba indanga jembitsü.

Linük ana senteper 'Terminal High Altitude Area Defence' dak sendakba nung Beijing dang South Korea den shishilemba nokdang aliba

lapoktsü ashitsü.

Hwang aser Pence na olemtep tembangba sülen North Korea dang parnok tesendaktep meraksai tashi ita lir ta sayutsü asoshi linük ana senteper sangdong ka sangdongtsü.

Mongulbarnü Pence-i Korea nung aliba American Chamber of Commerce-i ayongba senden ka nung o jembitsü.

March 10, 2017 nü Park Geun-hye Tir mapa nungi anendaksütsü sülen linük security atema shishia bilemja tawa tanü ka US nung tongtimbang ketdangsertemi South Korea maneni semdangdar.

US Secretary of Defense James Mattis aser Secretary of State Rex Tillerson natia February aser March ita tem nung Seoul semdangogo aser ibaji ajanga South Korea aser US na tsüngda defence tsütsü tashi ita longjemer aliba tali jungkai adoka sayur.

Mongulbarnü Pence Japan-i apusotsü aser iba sülen Indonesia o Australia nata semdangtsü.

Jakarta Angh Basuki-i vote timba angutsü

Jakarta, April 16 (Agencies) : Jakarta nung nüburtemi kanga ashishisang aser Muslim amangertemi par yimsü anema jembir ta tai tonglojka alisang, Angh Basuki Tjahaja Purnama-i Bodhbarnü Indonesia yimtiba nung election agütsü lia tang tashi nung pai vote timba angutsü nguteta lir, ta Deobarnü

ketdangsertemi metetdaktsü.

Shishilemba inyakyim bushisüngdang Charter Politik-i vote agütsütsüpur tebilemba asadanga mapang Angh Basuki nem vote agütsütsüpur timba liasü aser noklang nung shilem 47.3 agütsütsü ngutet lir ta osangbenertemi ashi.

Tanabuba jenjang nung

tesüiba mapang Culture Minister Anies Baswedan Rasyid lir. Pai noklang nung shilem 44.8 agütsü. Tanünga shilem 7.9 ji ashitsü makoker.

Indonesia ya alima nung Muslim amanger timtiba aliba linük lir. Yangi alima nung aliba Muslim amanger nisung million 263 rongnungi noklang nung shilem 87 tashi lir.



Colombo, Sri Lanka nung jana bendenba tesem ka chirepa nisung aika nembangba asüba mangtem April 16, 2017 nü military temi bener aoba noksa nung angur. Iba lendong nug tajemba agi nisung 12 asü aser ki 145 raksatsü. Jana bendenba tesem tuluka chizüka aliba ajanga anentsü dena aludaktsü.

Brexit sülen UK longjemer:Theresa May

London, April 16 (Agencies) : Deobarnü Britain Ato Kilonser Theresa May-i, linüki European Union (EU) nung madentsü vote asüba sülen tang longjemer, ta ashiba osangbenertemi ashi.

"Linük asoshi koma asünung ajungtsü ta kanga süoki ia otoktep jenti akaba sülen tarutsü asoshi bilema tejakdang aliba maongka agütsü asoshi nüburtem longjemdar," ta May-i la Ato Kilonser mendeni tur mezüngbuba Easter osang abendang ashi.

Roman Catholic Arogo nung putir ka jala, May-i Khristan ka intetba yimya aser lai angazükba taochi, lokti aser sensopur aria bilemba indang ashidang, item yimya ya asenok ajak asoshi lir, ta shisem.

"Item yimya ajak ya Khristantemi anogo shia benshiba yimyatemi lir," ta lai ashi.

Taoba mapang Britain Ato Kilonser, David Cameron-i yaküm Easter anogo nung linük rangben longjemer nokdaksü aser Khristan ka akümket yimya wazüka ayutsü shia liasü aser

kasaji laia tanü jembisem.

Lai, UK sobalibaji kanga takang lir. Yangi tamangba yimya balala agizükteter aser pei teshinüba shiteter. Asenoki alima rangben nung aliba Khristantem aser nübu agi tangar memenepeba tamangba yimsütem asoshi bilemstsütsüla, ta May-i ashi.

"Nüburtem pei amangnüba sadoka amangdangtsütsü aser parnoki amangba kecha tetsübu melii lemsatpedaktsütsü asoshi asenoki yaritsüla," ta laisa ashi.

Opposition nungi Labour Party lenir Jeremy Corbyn-i, Easter indang yimjung osangji alima rangben nung kanga arisanga meproktetsü südi," ta ashiba osangbenertemi metetdaktsü.

Corbyn-i, Alima nung alir amangbapur ajaki Yisu temeim aser taküm tenla agütsüba tatishtsü tulu bilemteta alitsü. Pai asen menen adokba aser yimjung bener arutsüba Easter osang tajung ajaki bilemteter. Easter ya Yisu Khrista kangki dong nung sür anogo asem lir külen tasü madak takok ngur shia aruba anogomung lir, ta ashi.



Istanbul, April 16, 2017 :- Turkey Tir, Tayyip Erdogan-i Istanbul polling station ka nung telemtetba ka asoshi vote agütsüba noksa nung angur.

NKorea-i missile tendangba takok mangu

Washington, April 16 (Agencies) : Deobarnü North Korea-i missile ka tendangtsü merangba takok mongutet, ta US aser S. Korea ketdangsertemi ashi.

North Korea-i parnok indang tongtimbang anogomung ka nung missile tasen aser launcher tem military parade akaba mapang sayuba sülen tananü iba missile tendang, ta osangbenertemi ashi.

Parnoki iba missile ji North Korea anüdoklen aliba Sinpo nung tendangtsü merang, ta South Korea nunger ketdangser kati ashi.

Iba kasa tesem nungi parnoki tan ita tetenzüklena ballistic missile ka tendangba 'Sea of Japan' nung alua tsük. Iba tzü dang 'East

Sea' taa ajar.

US Pacific Command-i, Deobar aonung parnoki missile tendangba ka putetogo, ta ashi.

South Korea aser US intelligence ketdangsertemi iba missile ji tapu koba liasü ibaji putettsü merangdar.

Aji oda süaka iba missile tendangbaji parnoki asü masüar ano North Korea nungi osang tejangja kecha maru, ta osangbenertemi ashi.


Pyongyang aser Washington na tsüngda mangatettep adoka aliba mapang ka nung Tir Donald Trump-i taoba hopta 'aircraft carrier USS Carl Vinson' den 'strike group of vessels' North Korea tzüleni yoka liasü.

Syria: Bomb lendong nung asür 112 jungogo

Beirut, April 16 (Agencies) : Honibarnü sorkar kübok aliba yimtsüng ana azüngtetba mapang gari ka nung taküm bendanga agütsür kati pai aniba gari nung aliba bomb pokdaksüba lendong nung asür nisung 112 jungogo, ta Deobarnü Syrian Observatory

for Human Rights-i ashi.

Parnoki ashiba agi, Fuua aser Kafraya tesem nungi nisung 98 tashi iba bomb apokba mapang asü aser tanünga tasürtemji yim azüngteta yutsür aoertem mena aliba bus garitem anüksü toktsüba sorkar anema raratem aser teyariteperitem liasü



Longchara Baptist Arogo, Changtongya town nung lanurtemi Yisu asoba mapang nungi Pa alima nung aliba, asüba aser shia aruba jilushi (drama) tarensena yanglur hopta ana tashi renemshia arur tan hopta piyong sayua mongogo. Iba mapang parnoki sayaba jilushi noksa ka yangi angur. (Changtongya Town, April 16, 2017).

India nung MP tanubosang Dushyant April 8 nü kibong akümtsü

Chandigarh, April 16

(Agencies): India nung Member of Parliament (MP) rongnung tanubosang, Dushyant Chautala April 18, 2017 nü kibong akümtsü. Pai IPS officer ka jala, Meghna agitsü aser iba kiyim sentongji Gurugram nung akatsü.

Chautala'er kibong rangben Sirsa nung kiyim sentong magi tsüngda renemkhunema amungba tesem nung adenshia lir.

Arishi kum 29 tain, Dushyant ya Indian National Lok Dal lenir aser tesüiba mapang Haryana Chief Minister Om Prakash Chautala'er semchir lir aser pa tang Hisar nungi Lok Sabha MP lir.

Dushyant tebu, Ajay Singh Chautala ya tesüiba mapang Member of Legistive Assembly

(MLA) liasü aser tetsü Naina Singh Chautala Sirsa district nung Dabwali assembly nungi tang INLD MLA lir.

Dushyant arishi kum 26 asüba mapang tang Congress nung alisang Kuldeep Bishnoi madak takok anguba sülen MP aküm.

Dushyant-i Anuja aser Paramjit Singh Ahlawat na jala Meghna Alhawat den kibong akümtsü. La ya tang Haryana Police nung IG rank officer ka lir.

Ahlawats ya Jhajjar kin nungi lir aser tang Gurugram nung alir.

Yashi 'Sangeet' sentong Sirsa nung aliba Chautala'er kidang agidang Dushyant tebu tanubo aser INLD lenir tain Abhay Singh Chautala na tabubang nung Dushyant mendaktsür Bollywood aser Punjab oshi kentem nug tsüngsanga aliasü.

Taoba mapang Deputy Prime Minister Devi Lal'er tanabuba semchir, Dushyant ya 2013 kum US nung master degree agitsü aliba toktsür Om Prakash Chautala aser Ajay Singh Chautala nati school tesayurtem tim mesüi shimokba ken o nung tepuokdaki aiba sülen politics nung ajemokba mapang nungi ajaki meteta aküm.

Chautala aser par jabaso tambusang na Dushyant kiyim benjong nung adentsü asoshi tang parole nung tepuokdak nungi adoka lir.

Ajay Chautala aser tebu O P Chautala naprong ya junior basic trained (JBT) tim masüba yimyalen nungi shimokba ken o nung aiba sülen kum terer (10-years each) tepuokdak ayutsü obendang agütsü.

Airport asem nung lendong ataloktsü osang sangoktsü

Mumbai, April 16 (Agencies): Deobarnü Mumbai, Hyderabad aser Chennai nung aliba International airports asem nung lendong ataloktsü akok ta kanga arsangtepa nüka mitogo.

Honibar aonung Mumbai police dangi e-mail ka ajanga airport asem nung lendong agütsütsü akok ta osang sangoktsüba sülen tanü ketdangsertemi tekümdangtsü osang agüja anük.

"Hyderabad nungi mejangjatetba tetsür kati e-mail ajanga nisung 23-i Mumbai, Hyderabad aser Chennai airport tem nung tayimtsü amaktsü ta osang sangoktsü. Iba dak sendakba nung tayimtsü anendak asemprongla nung Special airport security committee senden amen aser Bureau of Civil Aviation Security (BCAS)-i inyakyim akangshitsü atema

teinyaktsütem metetdaksü" ta Civil Aviation Ministry ketdangser kati ashi. Mumbai police DCP-operations, Ashok Dudhe dangi ununn0801@gmail.com nungi e-mail ji yok. Lai osangji shitak mesüra tai asütsü akok, saka senso ka ama lai ketdangsertem dang iba osang sangoktsütsübaaji tim ta angateta e-mail yok, ta zülua liasü.

Lai yokba e-mail nungjisa, "nenoki ni bushitsü temerang, kechiyong nenoki ni mebushitetsü" ta zülua liasü, ta ketdangserisa ashi.

Iba e-mail anguba sülen nungi Mumbai nung Chhatrapati Shivaji International Airport, Chennai International Airport aser Hyderabad nung Rajiv Gandhi International Airport tem nung ketdangsertemi security akangshia liasü.

Merokmi enseptsü atema tzü litre lakh 2.60 ain

Jaipur, April 16 (Agencies): Rajasthan nung aliba Mt. Abu nung merokmi enseptsü atema tanü Indian Air Force (IAF)-i helicopter nungi tzü belena litre 2,60,000 dak tema inogo.

Deobar anepdang nungi tenzüka MI-17V5 helicopter ana amshia anüngdang tashi nungbo tayimtsü ana jagi 19 ben tashi tzü belena tzü litre 53,000 daka tema iner liasü.

Arna yim anasa merokmiji nisung aliba tesem anasai arudar, ta osang angazüker.

Hokolbar anepdang Mount Abu nung miji adoka liasü.

Honibar aonung Defence otongdar, Lt Col Manish Ojha-i, "Wing Commander Thiagaraman aser Squadron Leader Praveen Tiwari nati anepdang nungi tenzüka

helicopter nung 73 ben tashi tzü belena jila anasa tzü litre 1,82,000 ain," ta metetdaksü.

Pai ashiba agi, nisung aliba tesem anasa tongtibangtsüa miji enseptsü merangdar.

Tan ama mongpu nung Rajasthan nungi aser Gujarat den tanga state tem nungi raliwalir nisung meyirjang aikati Mount Abu semdang, aser kar mekümdangba ajanga mi ya adok südi ta bilemer.

Circle Officer, Abu Parvat Vijay Pal Singh-i, "Mi adokba kuliji mejangja saka khenkhenbo arem nungji aou ajanga merokmi kanga bulur, iba den külemi nisungtemi ninang-mochitzü agitsü atema mi amshir, koba ajanga arem nung mi adoktsüa akok," ta ashi.

Tepeba Lemsateper

Onoki teti meima aliba asür **Lendinokdang Longkumer** (Longsa), Mongsenbai Ward Mokokchung, shiranga alidang nungi tasüba anogo (11/04/2017) tashi medemsor shirnokisa pei senti rongsen, nübu, shisatsü aser sarasadem agi nungita yariogo, nenok ajak dang tebang agi meshitetba pelaba iba zülü ajanga lemsateper. Nenok tangatetba takang, amalitep aser yimli sayu tajung atema ozüi kecha meyipa magütsüteter, saka asen tayanglur Tsüngremi maneni na/nür kibong moajangma.



~ Kinungsü, Chirnur, Adianu & Anükabang



UNGMA BAPTIST AROGO (Women Ministry)

April 14 nü ya Ungma Arogo Women Ministry tenzüka anogo lir. 14th April, 2017 anogo ya takum balaka Yisu Khristai asen menen asoshi Pa takum bendanga agütsüba tajung Hokolbar (Good Friday) anogo lir. Women Ministry nungi N. Ayangla Associate Pastor Women-i anir tenzüklam 21 tashi agi District Jail, Mokokchung semdanga liasü. Iba sentong nung N. Ayangla APW ajanga Tsüngrem O jembii aser taor ajaki shilem balala agia liasü. Sentong nung parnok tepuokdak alir 45 nem sempet tilala agi lemsatepa mapang tajung agia liasü. Iba sentong katettsüa District Jail Superintendent Mkg. Jail Chaplin aser Staff shirnoki tepuokdak alir den Tsüngrem O lemsatepa ministry inyaktettsüa maongka tulu agütsüogo nenok ajak dang Ungma Baptist Arogo Women Ministry ajanga kanga pelaba lemsateper.

Sd/-

N. Ayangla
Asso. Pastor (W)
UBA, Women Ministry

Sd/-

I. Aienla Jamir
Secretary
UBA, Women Ministry

'Anti-Romeo' tenzüksü asoshi UP CM-i lemteba nungtugu kümogo: Survey

New Delhi, April 16

(Agencies): Uttar Pradesh Chief Minister, Yogi Adityanath yimsüsüba mendeni tur ita ka majungdang state nung ozüng alema shi ayokba tesemtem shibangtsüba aser 'Anti-Romeo' sentong tenzüka ajanga iba sentong nungtugu kümogo, ta bushisüngdang telok ka ajanga bushitet.

Item tenokdangbatem ya BJP indang sentong lir ta nisung aikati aitsür saka state nung aliba district 20 nungi nisung 2,000 den bushisüngdang asüba mapang ibaji ajanga Yogi'er sorkar nungtugu akümba ya bushitet.

Gaon Connection ajanga iba survey agiba nung ozüng alema shi ayokba

shishilembaba shibangtsüba, anti-Romeo squad tenzüka, VIP yimya mamshitsü asoshi tuyuba aser sorkar indang office anasa sali-moko mayoktsü asoshi ozüng yangluba ya Adityanath'er sorkari telemtetba agiba rongnung tajungtiba lir, ta bushitet.

Ozüng alema shi ayokertem apuba mapa ya junger ta agizüker shilem 38.1 aser anti-Romeo squad tenzüka pela agizüker shilem 25.4 lir, ta osang ajanga ashi.

Anti-Romeo sentong tenzüka ya nisung aikati aijaka tetsür rongnung shilem 37-i iba sentong ya junger ta shiteter.

Adityanath-i aniba BJP sorkari item sentongtem inyaktsü telemtetba agiba junger ta ashir shilem 62 liasü.

High Court judge atema SC-i tenüng 51 benokogo

New Delhi, April 16

(Agencies): Supreme Court collegium-i linük nung state 10 High Courts nung judge shimtsü atema tenüng 51 benokogo.

Chief Justice of India (CJI), J S Khehar leniba nung collegium-i obendangertem tenüng 51 agizükogo, ta osang ka ajanga ashi.

High court collegiums balala nungi tenüng 90 benoka liasü aser item rongnung Supreme Court collegium-i tenüng 51 agizükogo.

Parnok 51 rongnung judicial officers 20 aser advocates 31 lir, ta osang ka ajanga ashi.

Collegium-i item tenüngji Bombay, Punjab & Haryana,

Patna, Hyderabad (Telangana aser Andhra Pradesh states), Delhi aser Chhattisgarh High court tem atema benoka liasü.

Supreme Court collegium-i benokba tenüngtemji Centre-i agizükra Jammu & Kashmir, Jharkhand, Gauhati aser Sikkim High Court temia obendangertem angutsü imlar.

Praneeth-i tan mezüngsüa Super Series title benogo



Singapore, April 16, 2017: Singapore Open asayamung mapang tebur kija final asaya nung takok angusang B Sai Praneeth (achiji) aser tanabuba jenjang nung takok angusang K Srikanth na pei anguba sempet amer tangokba noksa yangi angur.

SINGAPORE OPEN

Singapore, April 16 (Agencies) : India nungi temulunglemtsü badminton asayar B Sai Praneeth-i Singapore Open nung pa atema tan mezüng süa Super Series title benogo.

Deobarnü asayaba Singapore open final asaya nung pai India nungi külem medemsor K Srikanth madak otsüsüsüsa iba takok tulu angu.

Sen dollar 350,000 alang asayamung final asaya nung, yaküm Canada Open Grand Prix nung takok angusang aser taküm Syed Modi Grand Prix Gold final tonga asayasang, World No.30 Praneeth-i 17-21, 21-17, 21-12 agi Srikanth

madak takok angu.

"Na anogo shia asayaba nisung den asayatsüji kanga tasak. Tanü iba takok anguba asoshi ni kanga pelar. Tan iba asayamung nung asayaba bilemdangra ni pela bilemer. Singapore nung India nunger pusemertem ya kanga junger," ta minute 54 tsüngda final asaya nung takok angusang Praneeth-i pelasetasashi.

Super Series final asaya ka nung India nunger dang ana asayabaji tan mezüng lir aser tan iba asayaji kangasa repranger manenüsüka asaya.

Gopichand academy nung training agir anati katia ka koma asayar ibaji kanga junga meteta liasü.

Mezüng game nung Srikanth-i smash kanga junga

züka kinükleni kanga junga yoktetba ajanga takok angu. Pai iba asaya nung smash kija azükba ajanga point pungu ngua liasü.

Srikanth aser Praneeth na rally talanglang masaya saka point tem karakara ngua asaya.

Tanabuba game nung Srikanth-i karakara 4-1 angu saka Praneeth-i 7-7 nung tua menep.

Ano asaya yonga tur khen mapang ka tena 10-10 aküm aser iba süli Praneeth point ka tali aküm.

Iba sülenji Praneeth maneni point nguyonga atuba ajanga iba game ji pai 20-17 agi akok.

Game tasembuba nung Praneeth-i kanga kara 7-3 angu aser süngjem mapang tashi nungbo ano 11-5 kümer liasü.

Tena tsüngda point 19-12 akümba sülen Srikanth-i khen tezülen züktokba ajanga Praneeth 20-12 aküm aser iba sülen pai tatembuba point ngua Super Series title ji aben.

2010 küm World Junior Championships mapang bronze medal anguba sülen nungi Praneeth-i asayar tajung kar madak takok ngua arudar. Pai Malaysia nungi All England Champion, Muhammad Hafiz Hashim, tesüiba mapang Olympic aser World champion Taufik Hidayat aser World No. 1 Lee Chong Wei nunger koka lir.

I-League: Shivajians-i 1-0 agi East Bengal akok

Barasat (West Bengal) April 16 (Agencies) : Tanü Deobarnü Barasat Stadium nung asayaba I-League asaya ka nung DSK Shivajians teloki 1-0 agi East Bengal telok madak takok angu.

East Bengal-i DSK Shivajians madak tan agi pezüben buba tamakok angur.

DSK Shivajians pur asoshi goal kaji Jerry Mawihmingthanga-i asaya tenzüker minute 29buba nung yok. Asaya tanabuba tesadang nung East Bengal-i goal kaji

küptoktsü maongka aika ngutet ajisüaka parnoki item maongka ka danga magitet.

East Bengal-i minute 33 buba nung goal yoktsü kangsa maongka tajung ka ngutet, ajisüaka goalkeeper tejen, Subrata Paul-i Rowlin Borges aser Bikash Jairu nati metsüba ball tem kanga junga nokdangba ajanga meyoktet.

Tang tashi nung East Bengal-i 16 ben asayaba nungi points 27 nguteta lir aser Shivajians tanü takok anguba ajanga parnok 16 ben asayaba


nungi point 17 ngutetogo.

Tanü asaya nung East Bengal-i nisung pungu tashi melena asaya.

T.P. Rehenesh, Robert Lalthlamuana, Romeo Fernandes, Willis Plaza nunger melena Jackichand Singh, Bikash Jairu, Chris Payne aser Robin Singh nunger ait aser Subhashish Roy Chowdhury-i goalkeeper Wedson Anselme melena asaya.

Ajisüaka Shivajians telok nungibo shinga memeleni asaya tembanga asaya.

Table tennis:Fan Zhendong-i Asian title atonga kokogo



April 16, 2017 nü Wuxi, east China kübok Jiangsu Province nung 23buba ITTF Asian Table Tennis championships mapang tebur kija asaya nung takok angusang, China nunger Fan Zhendong-i takok marok amer pela tangokba noksa ka yangi angur.

Wuxi, East China, April 16 (Agencies) : Taoba mapang table tennis kija asaya nung Asia title bena alisang, China nunger Fan Zhendong-i ano maneni iba kasa marok atonga benogo.

Deobarnü iba final asaya

nung pai Jeong Sang Eun madak takok angu. Pai China nung asosang Korea nungbaji 3-0 agi koka ano tan-a Asian table tennis champion kümogo.

World No. 2 aser tangang arishi küm 20 tain, Fan-i arishi

küm 27 tain, Jeong madak 11-5, 11-5, 11-8 agi kanga junga takok angu. Jeong-i takok monguaka pai set tasembuba nungbo kangasa junga asayaago.

Iba takok marok ya dena tan agi Fan-i takok marok 8 atonga abener. Pai tang tashi nung title 20 tashi bena lir.

Fan-i semi final asaya nung nübur ajaki kanga sapua alisang Zhang Jike madak 3-2 agi koka iba final asaya tongtet aser Jeong-ia Koki Niwa madak 3-2 agisa koka Fan den final asayatsü maongka angu.

Iba jakdang asayaba tebur kija asaya round nung Korea nungba jagi kanga dang asayar tajung, Ma Long akok aser China nungbaia quarter final nung Japan nunger Niwa-i China nunger Xu Xin tsükdaktsü.

VIVO IPL 2017 APRIL 17, 2017 ASAYA
Delhi Vs Kokata - 4:00 PM
Hyderabad Vs Punjab - 8:00 PM

APRIL 16, 2017 ASAYA OSANG
Mumbai-i Gujarat wickets 6 agi akok
Pune-i Bangalore runs 27 agi akok

Nokdanger aliba mozü metetdaktsübaji International Tennis Federation tai: Maria



April 16, 2017 : Pungu ben tashi Grand Slam champion Maria Sharapova-i, yaküm shibangtsüba mozü tarensen nung 'meldonium' densema aliba la nem metetdaktsütsüba asoshi International Tennis Federation (ITF)-i teinyaktsü tim meinyak, ta aija ashi.

2016 Australian Open nung Sharapova dak iba shibangtsür aliba mozü tendangtetba sülen la küm ana tashi tennis asaya nungi anenja liasü, ajisüaka iba temerenshiji ita 15 küma ajemtsü.

Meldonium mozü ya 2016 küm tetenzük nungi World Anti-Doping Agency-i shibangtsür aliba mozü tarensen nung

inoksemogo, kechiba süra iba mozü yagi azü jajaba tashi itdaktsür aser temang kanga yakyaka kümdaktsür.

"Kechiba shingai kü dang official süa arur iba mozü shibangba indang mashi ? Parnoki ashi asübo iba ama tebilemstü madok süla," ta arishi küm 29 tain, Sharapova-i interview ka nung ashi.

"Shitakba taiji kü dak keta liasü saka ni küm tenet tashi chia aruba ajak nungi asetshio," ta lai ashi.

April 24, 2017 nü tenzüktüsü aliba Stuttgart Grand Prix nung Sharapova-a shilem agitsü renemshidar.

EVERYONE FEELS THE PAIN!

Oajm
CONTINENT
FAST RELIEF FROM PAIN

A Product of LIVSAV Group
CUSTOMER CARE:- 0250-6580183

BILEMDANGANG

"Nai jembizüka yoktsü aliba oji tamasa nai tendangma ang."